


Sing' lis tchan' ts'un, t'ai, kong'.
Explication des lois fondamentales
perçues par l'intelligence.

sous l'empire



MAISON MERE DES SOEURS
MISSIONNAIRES DE L'IMMACULEE-CONCEPTION
2500, CHEMIN SAINTE-CATHERINE
VILLE-DES-MÉJICO, MONTREAL, P. Q., CANADA

MAISON MÈRE DES SOEURS
MISSIONNAIRES DE L'IMMACULÉE-CONCEPTION
2900, CHAMIN SAINTE-CATHERINE
CÔTE-DES-MONTAGNES MONTREAL P. Q. CANADA

光緒十二年冬月

生理真諦

江南主教倪

重准



上海慈母堂活板

乾隆癸酉年較梓

析津居士孫 璋德昭氏述

宋君榮奇英

魏繼晉善修

同學

劉松齡喬年

較閱

趙聖修品之

性理眞詮提綱序

夫宇內究談性理者雖多。然得其要旨者實鮮。因其學淵微。其義精奧。且其道廣博而難盡知也。但第一吃緊要道。莫人性若也。蓋萬物非蠢則頑。惟人獨靈。靈則非特能辨物理。別是非。彰往察來而已。更能返觀自己。識其靈體爲何如。豈若蠢頑之物。但能順其自然之性。生長知覺運動。不能內照其本體哉。予自幼習眞傳。性愛窮理。用力久之。深悟人性。靈而且貴。宜先講明而切究焉。故特著性理眞詮一書。具論吾人靈性之體。謂何。靈性之原。謂何。靈性之道。謂何。夫靈性既有

其體矣。必有賦靈性之大本以爲其原也。既有其原矣。必有定靈性當由大道。使之率循。不敢或悖者也。究之備陳靈性之原。靈性之道。總爲靈性之體。探本尋源。指明正道。連類而及。使人共喻靈性之由來。知所向往耳。故此書之作也。特爲發明眞道實義。而眞道實義載於中國五經。五經者皆係古先明哲。窮理盡性。躬行實踐。將所得妙道精理。垂之千古。以教萬世者也。爰是沉思靜慮。殫盡心神。援引古經妙義。博採名哲格言。十餘年來。集成此書。公之天下。其中條辨多端。不能一言而盡。故設爲先儒後儒問答之辭。發明眞道以理。使

閱之者知予言之有本。述而不作。非棄古而妄談也。何謂先儒。信經不信傳。論經不論註者也。何謂後儒。信經亦信傳。論經亦論註者也。然之二儒。一居上古。一生近今。生不同時。人不同世。何以互相問答。如處一室乎。曰予生也晚。自慚鄙陋。不敢獨出己見。取譏高明。爰舉先儒之言。後儒之論。互勘對較。彼此相形。眞僞自著。猶如天平然。兩盤相持。法馬對準。錘敲之下。輕重昭然。絲毫莫爽。是篇也。雖於正道之傳。不敢自任。然是非分邪正判。眞道明於吾人靈性之眞解。未必無小補焉。是爲序。

旨

乾隆十八年歲次癸酉三月中浣

耶穌會士孫 璋德昭氏題



性理眞詮提綱小引

天地間物類紛陳。要不外理氣性三者。是故予著此書。多用
理氣性三字。以爲標本。誠願天下留心性理學問者。易達此
書。立論切實有據耳。今篇內所論氣字。固非空際摩盪之氣。
亦非口中呼吸之氣。乃萬物渾然各具之本質。所以受象成
形之材料也。以是知造萬物之材料。其名目雖多。然其總括
之名。惟稱之曰氣耳。所謂陰陽是也。理也者。卽具於萬物形
體之中。所以定其向而不能違其則者也。氣與理二者兼備
一物之中。謂之性。性也者。卽各物類之本體。具本能而爲此

爲彼效其用而不亂者也。今天地呈象。品物顯形。可以幾何二字盡之。所謂幾何者。長短寬狹高厚多寡之總名也。無論乾坤之高深。物類之紛疎。以幾何限之。則其內外之情。始終之界。皆可考而知。推測而得。至於吾人靈性。無長短廣狹之形。混高厚多寡之迹。人雖精幾何之學。安能測無聲無臭之神體哉。此吾所以反覆考詳靈性之本體。而莫窮其端委也。惟望重大體。輕小體。顧靈神。鄙形軀者。反求諸己。詳加體認。以自識其美妙而已矣。



性理眞詮提綱

總義

篇內所言人之神。人之神體。及靈神恒性大體等。並無分別。
總謂人之靈性。蓋對形而言。則曰神。對形體而言。則曰神體。
對形軀而言。則曰靈神。對形軀有死滅而言。則曰恒性。對小
體而言。則曰大體。惟如此分別言之。方見人之靈性。實屬神
體。係上主從無特造。與屬氣之物。迥乎不侔也。

篇內所稱造物者。造物主。萬靈真宰。乾坤真主。天地大君。萬
民共父。萬德之原。萬善之本。萬理之根。超衆神之全神。俱無
二意。要之同一上主耳。五經所稱上帝。原與此篇所稱上主

無異。今此篇不敢稱上帝。惟稱上主者。因近世有五方上帝。五行上帝。且有玉皇上帝。玄天上帝。伏魔大帝等稱。恐混同爲一。必致大乖造物主真正稱呼也。今惟稱上主。不敢稱上帝者。亦防微杜漸之深意焉耳。

篇內所稱眞教惟一者。乃惟一眞主。於開闢之初。親立以垂訓萬世者也。豈容有二乎。吾中國古儒相傳之古教。卽眞教之實跡也。但古教衰微。人心錮蔽。私欲叢生。上下千百年來。教出多門。無非妄自尊大。矯誣上主。雖名爲教。實害眞教。蓋教不本於上主。不可謂眞教。卽本於上主。而或有毫釐之差。

必有千里之謬。亦不可謂之爲眞教也。

孫 璋識





性理真詮提綱首卷

析津居士 章德昭氏述

靈性之體 目錄

首篇直指靈性本體

第二篇論氣之本性足徵靈性是神非氣

第三篇論神非陽之德

第四篇論人心自主足徵人之靈性非氣

第五篇以人之靈性與人之形軀較則知人之靈性非氣

第六篇論人靈神之本性思想之本義足徵人之靈性非氣

第七篇論人靈性非理

第八篇論人之靈性惟一不能有二

第九篇論人之靈性較禽獸之覺性大相懸殊

第十篇論人之靈性無死滅



性理真詮提綱首卷

析津居士孫 章德昭氏述

靈性之體

首篇直指靈性本體

後儒曰。人之一身。內具靈性。超絕物類。與禽獸迥殊。是故吾人本業。必宜窮理修德。以全其靈性之道。斯無愧於人之所以爲人也。但世人茫然莫解。謂吾人一死。全歸烏有。人之形神。皆屬於氣。氣聚則生。氣散則死。吾人祇此一世。過此則頑然冥然。並無知識。惟此世樂。足娛吾心。既得世樂。吾願遂矣。又將何求乎。予以經言惕之曰。子不聞作善降百祥。作不善降百殃乎。彼云據子言。則古今來當無爲善而遇禍。爲惡而獲福者也。何以修德之君子。時見困苦於終身。徇慾之小人。恒有逍

遙於一世者。此何謂也。子卒據經書所言。修德之獲報。昭垂萬世。名譽之流芳。彪炳千秋者。反覆欹動。而彼終弗領悟。奈之何哉。今先生據真實之理。誨人不及。定有妙論。啟人愚蒙也。

先儒曰。倘人之靈性果然是氣。氣聚則生。氣散則死。則專務世樂以快其身者。誠未可厚非也。何怪其謬執形神俱散之說。惑世誣民。流傳於人世乎。究之反求諸己。實與其本良弗合。故不敢公然顯悖靈性不滅之真理。取譏於人間也。

後儒曰。世人謂人之靈性是氣。謬云人死其氣即散者固多。然其中未嘗無孜孜好善之人也。

先儒曰。善或有之。而真善者難。蓋未識靈性之真體。烏知繕靈性之真功。宜乎僞學日起。僞善日興也。

後儒曰。人之靈性既非氣。究屬何體。

先儒曰。人之靈性。決不屬氣。其體純神。靈通萬變。自有主張。氣屬純形。頑然不靈。靈頑殊體。義不容混。此理具載五經。憑據昭然。並無可疑也。

第二篇論氣之本性足徵靈性是神非氣

後儒曰。人之靈性。雖云是神。不過陽氣耳。今子云靈性是神非氣。此說無憑。願求明解。

先儒曰。近代儒者云陰陽之氣。不過動靜。是靜既頑然。動亦頑然。究屬一氣。絕無靈明思想也。若人之靈性。乃能靈明思想者。今靜存之氣。不過塊然與木石相等。試問能靈明否。能思想否。必曰不能。夫陰陽等氣耳。陰氣既不能靈明思想。陽氣何以獨能靈明思想乎。

後儒曰。以理揆之。木石等實屬塊然之氣。似不能靈明思想也。

先儒曰。頑然者氣之性也。無論陰陽動靜。巨細精粗。總無靈明。無思想。夫陽氣無靈。謬謂有靈者。不過因其發揚在上。其體清輕故耳。不知氣有清濁。均屬頑體。既屬頑體。必有輕重。既有輕重。定有分兩。今試噓氣於皮包球內。較空皮包。便覺微分輕重矣。又以玻璃筒貯水銀。携陟山上。則水銀重於氣故沉。携至山下。則氣重於水銀故浮。觀乎此足徵山上氣輕。山下氣重也。苟誤解靈性爲陽氣。試問氣有分兩。靈性亦有分兩乎。氣有輕重。靈性亦有輕重乎。○若靈性是氣。此氣必是最精純陽之氣。常動無休矣。每察人之靈性。思慮百出。紛然不齊。刻無寧晷。今靈性之氣。旣云渺微。倘如此動搖太甚。不將速就消滅乎。或曰。飲食可補形神耗散之缺。何慮乎。若以此論。則是形有老幼。神亦有盛衰矣。何以耄耋能憶弱齡之事。且良

心一定之理。耄耋之年。與弱齡之時。其所知皆同。然而無或殊乎。○論人之靈性。止可問其能明衆理否。能應萬事否。決不可問其乾與濕。流與滯。寒與熱也。蓋明理等能。係無形靈神之本能。至於乾與濕等情。特係有形氣體之頑質。與人靈性之神體。絕無關涉。烏可執此而問人之靈神乎。

後儒曰。子謂人之靈性。是神非氣。雖不可問其有乾與濕等情。然可問其有明白與否也。此明白二字。豈不有關於氣乎。

先儒曰。子當知靈性之明白。與氣之明白。其義大相懸殊也。蓋靈性具明白。日與雪亦具明白。然靈性之明白屬神。日與雪之明白屬氣。靈性之明白屬靈。日與雪之明白屬頑。二者不容相混。靈性之明白。正所謂動而無動。靜而無靜者是也。氣則烏能。○若氣能思想。則在物各氣。宜其悉能思想也。夫在人有氣。在石亦有氣。何

未見石作人言。若云氣靜不能思。氣動便能思。在石有玉磬。玉振之下。何未見排律成文。叶韻爲詩乎。若謂濁氣不能思。清氣能思。在水亦有氣。何未聞涇愚渭智乎。

後儒曰。氣有時動。有時不動。故氣有時能思。有時不能思耳。

先儒曰。論氣之本體。可以動可以不動者也。蓋氣之本性。原不常動。時而有動。不過移此就彼。時而不動。不過凝居定所。究之無論動否。不過氣耳。豈能有所思乎。

後儒曰。謂氣能思想者。無傷。據性理諸書云。人物皆稟天地之性。則神人萬物。俱有仁義禮智。但人得氣之正。物得氣之偏耳。

先儒曰。假令萬物俱有仁義禮智。不但禽獸有仁義禮智。雖頑如水火。亦有靈明能思想也。以此而論。何以當水火相尅時。火不思避水。水不思避火。以保其本體乎。

今以實理斷之。惟人有靈性。方有仁義禮智。至於萬物。俱無仁義禮智。蓋有造物者定其性如此。萬物不過聽其命。盡其當然。不得不然耳。不知者竟欲於氣之偏正。分人物之靈蠢。則是人之靈性。同然一氣。與萬物等矣。如此則古哲所稱人爲萬物之靈者。果何謂哉。

第三篇論神非陽之德

後儒曰。子謂神人萬物。不同一性。中庸何以云鬼神體物不可遺。註云。鬼神者。二氣之良能。又云鬼神乃陰陽之德。

先儒曰。神係靈體。陰陽係氣體。非可以陰陽之氣體。誤認爲鬼神之靈體也。倘以陰陽之德爲神。則是陰陽卽鬼神矣。何也。陰陽之德。卽是陰陽。猶如藥之德。卽是藥。非藥之外。另有藥之德也。豈所稱神超乎陰陽之上。而自爲神耶。然論神之說。古

聖自有至理。後學失其真傳。姑不具論。仍將以前所辨氣之本性。無靈明。無思想。接續講去。其說方有脈絡。○氣動之形象若何。不過方圓曲直。移此徙彼等情。氣之本體若何。不過冷熱燥濕剛柔等情。凡若此者。亦第順其頑性之本然。並非靈性之本義也。今試問子。神有神之真解。形有形之確論。豈不甚相反乎。

後儒曰。然人之神形兩端。原不容相混也。

先儒曰。據今儒云。人之形神俱屬氣。但神之氣屬陽。形之氣屬陰耳。從是說也。則陰陽與神俱氣也。亦俱形也。果爾。則日稱爲太陽。亦不過一巨形耳。並未聞古儒稱日爲神也。何獨稱陽氣爲神乎。

後儒曰。人之靈神爲氣。乃純陽之精氣耳。

先儒曰。欲知吾人神形之分。須辨其何爲神。何爲形。方見分曉。凡屬形體。不拘大小。

必有幾何。無幾何。不能成形。

凡天文地理。測量推算。及製造器皿。皆有規矩尺寸。若無幾何。不能成物。

今察純陽之精

氣。雖微渺至極。究屬有形。

有形則有質。既有形質。必有度數。

如冬夏呼吸之氣。有巨細可見。

野馬塵埃。

有高下廣厚可見。

聚諸細微。積秒成分。積分成寸。積寸成尺。積尺成丈。便至於億萬數之

多。成一大幾何矣。

若人之靈性。爲純神之體。無形象。無聲臭。絕不落幾何之形。何

有聚散分合之義。倘謂人之靈神。係最精純陽之氣。試問子將聚人之靈神爲一

大幾何乎。抑將分人之靈神爲一小幾何乎。將聚諸細微靈神。成一塊然大靈神

乎。抑將分塊然大靈神。而爲諸細微之小靈神乎。按此。則人之靈神。洵屬於氣。與

古哲形神相反之義。不誠大相刺謬乎。

第四篇論人心有自主足徵人之靈性非氣

陰陽者。氣之體也。既爲氣。則其本性一定也。定則其性不移。如火煖物。不能涼物。

水涼物不能煖。物詎非其體一定乎。人之靈性。既能自主有定。又能變動無常。或用愛。或用惡。倏想此。忽想彼。卽如與人講論事理。往復辨難。千百其辭。無不可隨機應變。用各不同。此靈性之能也。豈氣之能歟。○動靜者。氣之用也。發於無定者也。無定則不能自主。其動也不得不動。其靜也不得不靜。人之靈神。或用愛。或用惡。或想此。或想彼。雖千變萬化。俱以有定之心定之。權由內操。不由外假。氣烏乎有是能。○今有人於此。夙昔爲惡。一旦變爲善人。試問此變善之心。果係氣使之然歟。如果係氣。則人皆有氣。何以不能人人皆遷善而改惡。且禽獸亦有氣。何以禽獸不能變蠢而爲靈。足徵變善之所以然。其能係靈神。迥不係氣也。

第五篇以人之靈性與人之形軀較。則知人之靈性非氣。

飲食之氣。所以養人形體。使精力壯健。便於運動。如操刀射御等事。此乃小體之

事全藉氣力。無關靈性之大體。若修身立德。博學明理。辨別真僞。推論淑慝等情。此乃靈性大體之事。存乎修省。何關形體。倘人徒知飲食以養形。而不知修德。以養神。豈非重小體而輕大體乎。孟子曰。飲食之人。則人賤之矣。爲其養小以失大也。以是知靈性者。乃人之所以爲人也。○有靈性之生活。有形軀之生活。靈性之生活。思想之本能也。形軀之生活。不過精血之強固耳。有靈性之美好。有形軀之美好。靈性之美好。在仁愛理義之備。形軀之美好。不過飲食以助之耳。孟子所謂養其大體爲大人。養其小體爲小人也。且有時靈性之美好。爲形軀之不美好。如君子蒙難捐軀。舍生取義。爲靈性之大德業。大功名。而形軀則肝腦塗地。肢體殘毀矣。有時形軀之美好。爲靈性之大不美好。小人驕奢淫逸。無所不至。誠爲靈性之大兇惡。大疚疾也。孟子所謂從其大體爲大人。從其小體爲小人也。○人之五

官與靈神較能。五官之能。缺而有限。靈神之能。廣而無涯。蓋目能視。映日則光輝。燭爍。目力卽昏。耳能聽。聞霹靂則聲音洪大。耳力有傷。人之靈神。能明衆理。理愈明。則神愈精。道愈深。則神愈廣。誰得限其能。中庸狀人心之洞達。曰溥博淵泉。又曰淵淵其淵。豈五官所可擬歟。

第六篇論人靈神之本性思想之本義足徵人之靈性非氣

若靈性果係氣。則人之神思。卽得以幾何限之矣。今觀博學多聞之士。仰觀俯察。廣搜遠覽。愈收愈容。愈容愈廣。有限之氣體。何能受此無限之學問。又試有一馬。於此自有一定顏色。一定尺寸。此可畫而得也。以其象可得而幾何也。若無一定顏色。一定尺寸。但懸揣一馬之意象於腦中。此不可畫而得也。以其意不可得而幾何也。况乎人之思想。無顏色。亦無尺寸。乃欲渾然畫一思想。爲幾何長。幾何大。

此決不可畫而得也。以靈性之思想。不可得而幾何也。靈性所發之思想。既不可得而幾何。發思想之靈神。又烏得而幾何乎。○人之靈性屬神。其含納物象之理。亦屬神也。故外目所見之形色。靈神能脫其形色。而直達其精意。如一天字書於紙上。其色或紅或黑。外目祇見其紅黑之色。人之靈性。能脫其色而明其本意也。又如一物也。或具剛柔冷熱等情。外形祇覺其剛柔冷熱之外情。人之靈性。能脫其外情。直透其本然之妙也。以是知人之靈性。非有紅黑之色。剛柔冷熱等情。而爲神也。不然。何以能超乎物象之表。而會悟其本體乎。則人之靈性。非氣無疑矣。

○氣之所動。祇及現在。不能遠及已往與未來者。如火焚木。近則焚。遠則不及矣。人之靈神。無論已往未來。高如天。廣如地。上下千古。遙遙百世。無不神以知來。知以藏往。且不疾而速。不行而至。神而明之。默而通之。氣則何能。○若將天地人物。

葉一畫圖。無一不備。決無此事。况欲頃刻點筆成圖。更難爲。人之靈神。能將天地萬物。一時而包羅一心。且能透徹天地之外。更能頃刻備具而收。何其弘也。大哉人之神乎。詎得以幾何限之哉。○譬我手摹一巨形。不過摹其一處耳。弗能遍摹其全體。試證之吾身。往往摹其足則熱。摹其手則冷。此不爲怪。因氣有幾何。本然之性如是。在一處不能並時而爲熱爲冷也。人之靈神。一時而有全神之運用。一時能並覺其全身之冷熱。覺其爲冷。用神全覺。覺其爲熱。用神全覺。我有思。用神全思。我用愛。用神全愛。覺也。思也。愛也。皆係全神之運用。若然。則無幾何之全神。安得以有幾何可分之氣當之。

第七篇 詳辨人之靈性非理

後儒曰。謂人之靈性。是神非氣。此論良然。但人之靈性。雖云非氣。不過是人之所以

爲人之理耳。

先儒曰不然。理氣同爲一體。論頑物則然。論人之靈性。則大謬不然。論頑物則理氣二者不能相離。因理與氣卽係其性耳。譬之房室。輒瓦木料等。其氣也。按規矩準繩。裁成棟梁。門牕戶壁。經之營之。布置工巧。便人居處。其理也。是房之理。不離房之氣。二者原相連屬。同爲房之一性一體焉。若夫人則大不然。所行善惡。罔弗操之於內。主之於心。或欲作此善。或欲作彼善。皆察而後明。明而後定。定而後行。良由靈性居中以爲之主宰也。若理不過規矩法度之謂。待人推行。豈能若此乎。故祇以理氣稱之爲人。是不知人之所以爲人者。乃靈性耳。決非理也。○性理諸書云。人稟氣雖正。亦不過如几案之端正。日月之圓滿。諸物之得宜等耳。究不脫理氣二者。然几案雖不合式。几案之理。不能改其不合式而適於中也。日月有食。日

月之體有黑點。日月之理。不能改其食與黑點之缺欠也。若夫人雖窮兇極惡。卒能改過而遷善。去舊而更新。豈若理拘於一定。無能變通而改其常度乎哉。

第八篇論人之靈性惟一不能有二

後儒曰。性理諸書。分別心靈爲神。膽靈爲魄。脾靈爲魂。腎靈爲精。豈非一人而具多靈乎。

先儒曰。信如是說。將人之靈性。不止有四。且有多靈矣。試論人之一身。內而五臟六腑。外而五官百骸。以及筋骨脉絡。其數莫紀。設一肢有一靈。不將多肢各有一靈乎。試返己自驗。未有不知己之靈性惟一者。知己之靈性惟一。即是己之靈性。返觀而知我惟一也。知我惟一。即是知我之靈惟一靈也。人之靈不惟不能有多。且不能有二。設我專心默運精思。忽有友人進我室中。斯時神思一往情深。明明其

人當前而不見不聞。足徵一靈用事。並無他靈代應也。

後儒曰。子謂人之靈性惟一。而經書乃有靈性恒性明德明命峻德大體良心等。各種稱呼不一。豈非人之靈性各有不同乎。

先儒曰。不然。名雖不同。靈性則一。如一人本爲翰林。而稱名不同。或稱詞林。或稱大人。或稱先生。名不同而人則一也。

第九篇論人之靈性較禽獸之覺性大相懸殊

後儒曰。今觀禽獸似有思想之能。其覺性亦是靈性乎。

先儒曰。觀禽獸之外貌。若有思想。但未敢定其真有思想否也。嘗聞一種格物家論。禽獸有思想。如良工所作之木人相似。因其內具消息。外有機發。能行走拜跪。坐立言談。儼如活人。此不過狀禽獸能思想之外貌。非可據爲定論。姑無論此。即如

子所云。禽獸能思想。究之禽獸之思想。較人之思想。迥乎不侔。何也。人能明理。能辨是非。分邪正。作善作惡。且能自作主張。剛柔自持。善則從之。惡則避之。今觀禽獸皆無是能。則知禽獸之魂。但有知覺。非有靈神矣。

後儒曰。禽獸之魂。既非氣。亦非神。究屬何體。

先儒曰。禽獸本性。只能有覺。不能有靈。其所覺者。不過屬氣之物耳。氣之外。便不能覺矣。且不能明道德。通義理。人之靈性。能明道德。通義理。不依形而自主。常超形而能思。大非禽獸可擬也。○人按音韻。吐辭爲經。出言成章。以寫心中之蘊奧。因其地而言其言。因其人而別其語。隨機應變。用各不同。運使自己形骸。作彼作此。從心所欲。且形無定用。用之此而此效。用之彼而彼效。非若禽獸拘於一定。不能相通而改換他樣也。○設禽獸有靈性。而能明理。必能於常習一法之外。另生別

技之巧思矣。何以於常習之外。卽蠢然而不能變通乎。如蜘蛛織網。不能易吐絲而爲繭。燕子唧泥。不能易唧泥以結窩。推之司晨者不能守夜。巢居者不能窟處。且各方禽獸。習慣本然。何以從無高卑。又何以不能如人之修德而積善乎。

後儒曰。人能明理。而禽獸不能者。不過人性得其正。禽獸之性得其偏耳。

先儒曰。倘以偏正之說。論人與禽獸之性。不惟不能分析人與禽獸之性。且將人與禽獸之性。混爲一致矣。夫人之性與禽獸之性。其相懸者。不在正偏。乃在靈蠢耳。

孟子云。犬之性不同於牛之性。足徵人之性愈不同乎犬牛之性也。豈祇正偏而已哉。譬如有山兩座。或一山端正。或一山偏斜。或同一山也。未經地震以前極正。既經地震以後則偏。雖山形有偏正之異。要之同一土石耳。若論吾人之心。則大不然。人之心若順五倫。則此心始正。倘悖五倫。則此心卽偏矣。然而正偏不同。總

之一心也。惡人之性爲偏。善人之性爲正。善惡不同。亦同爲人類也。卽聖人亦與我同類者。總之人同則性同。禽獸與人不同類。卽與人不同性也。故偏正之說。非別人物之不同類。乃僅別禽獸之性稍差耳。若論人物而從偏正之說。詎非告子犬牛之性與人性同乎。當知禽獸惟知徇形而囿於形之中。人則超乎形而能神乎形之外也。兩性不同。不啻天淵。安得以偏正之說。別人性與禽獸之性乎哉。

第十篇論人之靈性無死滅

後儒曰。唯唯。聞子妙論。已深知人之靈性爲人之大體。無容置議矣。憶子往日之論。欲辨人之靈性不死不滅。與人之形軀大異。此事最爲吃緊。願明教我。以啓心蒙可也。

先儒曰。人之形軀是氣。氣有散滅。是以有死。人之靈性。是神非氣。非氣則無散滅。之

因。何由而死。蓋形軀者。人之僞我也。靈性者。人之真我也。試觀一人。或眇一目。研一臂。斷一足者。形體雖缺。而靈性之真我。依然猶在也。且我之學問善惡。依然猶在也。是故形軀既滅。而知己之真我。明理之真我。自主之真我。亦依然猶在也。○人之形體。因老而衰。私欲與記念二情。亦與俱衰。因此二情。其用半由靈性。半由形軀。但明理樂善愛惡等情。不與形軀而俱衰者。因此情專屬靈神。故年雖耄而神不衰也。且較之壯年。更加精強。如孔子六十耳順。七十從心。其明證也。可見人之靈神。在形則能御形。不隨形爲動止。離形更能自主。且能超形而自存也。○爲義死節。君子所甘。若靈性隨身死而即滅。是殺身成仁。舍生取義。縱歷艱難困苦。於本人究屬徒勞矣。亦何益哉。

後儒曰。君子修德。功德隆盛。雖無益於己身。却有益於子孫也。

先儒曰。信斯說也。惟有後者。始可以舍生而取義。若無後者。則死爲徒死矣。夷齊兄弟讓國。餓死首陽。鄧伯道棄子存侄。窮困異域。其爲義而死也。不將徒自苦乎。○仁義道德。靈性之至善也。人之神欲止乎此。必不屑形軀之僞樂。詩云。旣醉以酒。旣飽以德。言飽乎仁義。所以不願人之膏粱之味也。今人之靈神。飽乎仁義。旣與形軀之僞樂無涉。則知人之靈神。原不倚形而自立。故可離形而猶存也。○人死無他。乃靈出形外耳。形如室。靈如室主。室傾而室主仍在。形死而我神自存。又靈性如工匠。形軀如器具。器鈍則匠人置之。形頽則靈性舍之。其義若相似者然。○設人死而靈性與之俱死。是人反苦。而物反樂矣。何也。吾人居世。逐日焦勞。終身勤苦。過去有追悔之苦。現在有操心之苦。未來有防患之苦也。若禽獸則趨叢走廣。飛鳴食息。優游現世之樂。絕無後世之憂。豈不較樂於吾人乎。○設人死而神

與俱死。是君子又較苦於小人矣。何也。君子在世。不屑世樂。克己修德。積功累仁。寧疏食飲水。簞瓢陋巷。視富貴若浮雲。棄天下如敝屣。終身不悔。若小人則縱情肆志。行險徼幸。驕奢淫逸。無所不至。死則全歸於無。是君子徒費苦心。不獲真賞。小人時多快意。莫膺真罰。豈經書垂訓。作善降祥。作不善降殃之正理乎。

後儒曰。子謂人死其靈神必不死。此理孔子定然深知。何以子路問死。孔子乃云未知生焉知死耶。

先儒曰。孔子之言。自有深意。蓋知死之理。即在知生。意謂吾人居世。惟當修德行善。以盡其所以生之理。自然生順死安。無復遺憾矣。並非言人死之後。人之靈神。隨卽散滅之謂也。倘人死而神與俱死。將孔子所云朝聞道夕死可者。果奚謂哉。夫自朝至夕。死在須臾。聞道與不聞道等耳。何以有可否之分。且君子何必云慎終。

曾子何必云吾何求哉。惟得正而斃焉則已乎。不但此也。且經書所載喪祭之禮。與夫追遠之道。俱屬虛設矣。○人之靈性。非氣非理。不隨形而散。予旣比物連類。旁引多證。條分縷晰。言之詳矣。然子尙苦多疑。未經貫通。今欲剴切詳明。宜先推明此理之本原。方能使吾子夙疑盡釋耳。

後儒曰。我聞子言。固已心悅誠服矣。但此理所關匪輕。願竟其說。以醒心迷。無如議論精微。猝難驟明。今聊卽吾子妙論。靜中深思。俟他日再請大教。以啟茅塞可也。

性理真詮提綱二卷

遠西耶蘇會士孫
璋德昭氏述

靈性之原

首篇論上主爲吾人大父母

第二篇論天地萬物皆供人役使

第三篇論天地萬物俱有始

第四篇總論太極

第五篇論理非萬物之原

第六篇論陽動陰靜不能爲造物主

第七篇論陰陽受造並非無始自能生物

第八篇論造物主能造天地萬物又能宰制安養令萬物各得其所

第九篇論造物主有主張權衡人之性命有本義

第十篇論造物主惟一不能有二

第十一篇駁西銘萬物一體之說

第十二篇論上主爲萬善之準萬德之原

第十三篇論上主爲萬理之原

第十四篇論上主爲人所向之極

第十五篇論世人因居世多苦致疑宇內無上主解明此疑

第十六篇論人之靈性非氣並無死滅特賦於上主再加明論解人心惑

第十七篇論上主至公無私賞善罰惡毫髮莫爽可見人之神無死滅

第十八篇論世福有缺不能充滿人心足徵人之靈性決無死滅

第十九篇明辨性理諸書謂天下之物不論靈蠢俱有始終之說



性理真詮提綱二卷

遠西耶穌會士孫 章德昭氏述

靈性之原

第一篇論上主爲吾人大父母

先儒曰。子以前明論人之靈性。非理氣。非陰陽。卽經書所稱恒性。明命峻德。孟子所謂人之大體是也。子旣聞之詳矣。試問子形軀爲父母所生。固屬陰陽。特人之小體耳。若人之靈性爲人之大體。非屬陰陽。果孰造之乎。

後儒曰。倘人之靈性果是陰陽之氣。則人之神允爲父母所生矣。今據吾子高論。且據中國古經微言。確知人之靈性實非陰陽也。但父母有形軀亦具靈神。以形生形。以神生神。父母有何不能。况夫以兩人之神合而生一人之神。更覺易易耳。

先儒曰。論父母之形軀。原係陰陽。父母以形軀生子之形軀。是以陰陽生陰陽也。以陰陽生陰陽。乃係以形生形。此父母所能及者也。但人之靈性。係無形之神體。惟超乎衆神之全神。具全能神智。始能從無氣而造此大體之神。賦之於人。使之具衆理而應萬事也明矣。夫從無而生人靈神。生人大體。稱曰超乎衆神之全神。畢竟爲誰。乃造物主是也。頌云。降臨有嚴。不僭不濫。稱爲萬民之大君。大雅稱爲萬民之大父。故古先明王用郊祀之禮以祭之。禮記所云。事上帝如事親也。今人竟不明此造物主。卽係萬民大父。宇內元君。故其流弊不可勝言。或習焉而不知。或知焉而不加敬。加愛。或敬焉愛焉。而非真正之禮。何怪其昧昧終身。而不獲洞見大原乎。哀哉。

後儒曰。吾中國經書所稱民之大父母。子稱其爲超衆神之全神。其能智無窮。係我

古先哲王郊祀之上。主人之靈性。係其從無而造。此恩大矣極矣。但人之形軀屬陰陽。獨係父母所生。其恩罔極。亦人子所當竭力以事之者也。

先儒曰。子言誠是。蓋上主大父母而下。惟我二親之恩爲獨隆耳。人思二親之恩爲獨隆。愈知此大父母之恩爲更隆也。試觀物類。烏鵲反哺。牝鹿跪乳。食獸尙能知此。何況人乎。故人子違逆其親。卽目爲凶惡至極。國有常刑。卽加誅戮。以是知吾人但愛二親。而不知推本於萬民之大父母。而愛敬彌篤。尙未知宇內大孝之全旨。畢竟何在也。蓋物類蠢冥。但有知覺而無靈性。原不識造物主深恩。至於吾人。不惟內具靈性。知係造物主所造。卽以人之形軀而論。超越物類之上。亦係上主以父母而生。憑據洵有多端矣。人能近取一身。五官百骸。諸種經絡。血脉貫通處。深思其安排布置。恰中其則。各適其用。便知造物主以父母生我形軀。其神智妙

用。允非人之意見所能窮極矣。夫造物主神智無窮。定知其係超衆神之全神。而非太極陰陽。係氣之物事。足以當之也。氣頑無靈。不能有智而運思。予以上已透切發明。子知之已審。無待復陳矣。所謂智也者非他。惟在精思妙慮。欲得恰切之法。以遂其本意也。曾見智者造一絕妙器皿。而此器內外精粗。定然全美無缺。蓋此材在此不相宜。而更之於彼。令其適中。在彼不相宜。又移之於此。使之恰合。誠欲此器合此用耳。今詳觀吾人一身。百體協合。彼此相資。大小相助。無稍乖戾。如此恰當完美。造物主豈僅爲形軀計哉。因人之靈性。具神智。應用無方。而用耳以聽。用目以視。用鼻以臭。用口以言。用四支以動以履。缺一則靈性便失其役使矣。今觀人之形軀。如此全備無缺。件件合式。則靈性居中運用。而五官百體。莫不各效其用。聽其運動也。足徵造物主神智。精微妙用。洵非人之意見。所能想像其萬

一者。豈但陰陽之氣而已哉。今但論人之形軀屬小體。其諸種妙處。已足明微造物主神智無窮。不可思議。况乎人之靈性屬大體。靈明內蘊。其精工美善。不愈足微。造物主全能神智。更不可以人之識見推想乎。人苟能將人之大體與小體。安置恰當處。一詳究焉。必然深服吾輩古先明儒。拜敬造物真主。事之卽如事親。其義理親切。更彰明而較著矣。○試譬之一人。二親生其身於地窖之中。此人生長於斯。從未覩天地之高厚。日月之光華。及萬物之雜陳。我於地窖之中。勸其識認造物真主。係萬民大父。不必援引多證。但據吾人形神兩件。切指而詳示焉。彼必能據本心之良。深信宇內定有此造物真主也。迨後引之出離地窖之中。明觀天高明上覆。地博厚下載。萬物諸種美妙。與人所以相因相須之處。吾知此人更曉然知天地間。有造物真主。爲萬民大父。而感恩報德不容已也。

第二篇論天地萬物皆供人役使足徵宇內有造物真主

曠觀天地萬物與人相因處。足徵宇內有造物真主。洵無可疑矣。蓋天地間諸種萬物。無一物不與人之五官相連屬。我有二目。則天地內有日月以對目。我有兩耳。則天地內有五聲以悅耳。我有口。則有五味以適口。我有鼻。則有五香以適鼻。我有四肢。則有剛柔冷熱等物。以合四肢之用。且萬物繁生。或取其羽毛以蔽風寒。或用其爪牙以作器皿。或資其有力。以備耕種。或因其善走。以供乘騎。或司晨。或守夜。或馴或猛。種種諸物。罔非吾人切身之依。至於草木五穀。或養生送死。或治病療疾。又與吾人之口腹相合。全身諸症相符也。此必有造物真主。具全智安排精巧。具全善愛民如子。斷不使一物不備。致吾子有仰望莫遂之隱耳。又日月星辰繫於天上。運動有常。按時定候。絲毫不爽。於人相因處。更爲切急。太陰報一。

月之時。太陽指四季之候。恒星明已往之歲。且日煖下土。令地與海中濕氣。騰至空中。變爲雨露霜雪。滋潤大地。生植五穀百果。以養吾人。因而人生天覆地載之中。優游自得。殷然各遂其生。各適其性。設使但有天地萬物。而無人居乎其中。雖有萬物。盡屬虛設。將見地爲荒區。草木暢茂。禽獸繁殖。獸蹄鳥跡。徧滿寰中。天地徒有其覆載。日月徒有其光華。山海徒有其流峙。且蠶吐絲。蜂釀蜜。羽毛鱗甲。五金草木等物。俱爲無用矣。然而世上有人。天地萬物。無不緊切吾人日用。布置恰合。件件巧妙。由此觀之。則造物主實具父母之心。稱曰萬民大父。洵名實兼全。而至德無涯矣。

第三篇論天地萬物俱有始。諸子與荀子。齊東野語。劉向新序。張衡後漢書。蘇軾

人役使。更知其有始矣。若使人類無始。則生齒日繁。地窄人稠。不特地不能容。將人不聊生。何以生活於天地之間乎。上稽古書。天地初闢。人民稀少。諸務未興。朝野未判。民皆荒聚野處。並無宮室。大地之上。盡爲茂樹叢林。未便耕耘。以謀衣食。故一切衣冠器用。禮樂文章。概乎未備。迨後人民稠密。而一人首出。聰明睿知。方能董事羣黎。治曆明時。分疆畫里。然後朝野方分。政務漸舉矣。此不惟我中國如此。偏察天下各國。莫不皆然。足徵彼時寰區之內。人民概皆稀少也。卽以唐虞中天之時而言。唐虞數百年前。人民定然稀少。由此而遞推上古之時。人民愈爲稀少。不過一家耳。夫一家之初。必係男女二人。此二人者。必係萬民元祖無疑矣。此理大有確據。無待詳辨。今曠觀宇內各方之人。或地隔重洋。相距數萬里之遙。雖風俗不同。語言各別。然有數種常行之規。竟致不謀而合。若合符節者。豈非上古

人稀同居一家一國。元祖元宗公議所定成規。令其後世子孫世世遵守。不容或替者乎。卽如各國所行郊祀之巨典。值災遇患。沐浴齋戒。誦經祈禱之實禮。冠婚喪葬之儀文。及一切耕田所需器具。孩童所頑耍之物。天下萬國。大概皆同。推其原並無他故。總因起初原係一家。一家所發常言。一家所定常規。所遺古跡。人已習熟。萬世而下。莫能全易耳。○微特人類有始。下至禽獸魚鼈昆蟲草木。亦俱有始也。蓋諸物既具生活之性。俱由胎卵種粒而生。今觀數種微蟲小草。亦必由種而生。斷不能無種而自生。倘一物能自生。此一物也。必一時能有。亦一時能無。蓋有之無之。皆任己意也。今曠觀宇宙萬物。俱有形體。既有形體。必有界限。既有界限。是孰定其界限者。試論吾人必有其界限。不能任意而高百尺。亦不能任意而矮一寸。何也。有定其界限者也。假令人能始已。必欲其全美無缺。聰明睿知。無人

可及。富貴福澤。永綿萬世矣。而今不然。決知其有始也。試問孰始人類於世。且孰始天以覆人。地以載人。萬物以養人乎。是必有始造乾坤人物之造物主耳。要之人之靈神。係此大父母從無而造。人之形軀。亦係此大父母命父母而生。而開闢之初。萬民元祖。更係此大父母特造。益可知矣。

第四篇總論太極

後儒曰。吾子以上明辨人之靈性。實屬神體。非關理氣。因理氣在物。渾成一體。並無靈明思想。足徵人之形神。及天地萬物所有之妙。俱係造物真主。神智無窮所造。此言恰切。洵無可疑。但考周子太極圖說。云無極而太極。太極動而生陽。靜而生陰。一動一靜。互爲其根。而天地萬物以生焉。以此立論。庶高諸儒之上。微見大原乎。

子張
先儒曰。近世學者多稱太極。尚矣。以爲造化之原。於是乎在品彙之繁。於是乎出。故解云無極而太極。今按太極之實義。確切論之。乃係後儒借太極之名。另創新說。以伸己意耳。大非孔子繫易本旨也。孔子繫易而贊曰。易有太極。是言易有至大至極之元質。爲上主造生天地萬物公共之材料。所謂太極是也。並未嘗卽指太極爲肇造天地萬物之主宰也。後人不察。竟將上主抹煞。繪畫奇偶之像。謂太極之先。並無上主。止此太極一動一靜。卽生兩儀。由兩儀生四象。由四象生八卦。竟認太極爲生物之主。如之何其可耶。夫太極蘊陰陽。係元質。並無靈明自主。不過爲萬物之材質。安得稱爲造物主。今論造物主雖無形體。實有無形至靈之神體也。旣有無形之神體。必有無形之神智。詩云。明明赫赫者。正指上主無形之神智。昭然莫掩耳。用其神智。造成萬有。是萬有造於上主無形之神智。非造於太極至

極之無也。今云太極本無極。又云。非太極之外。復有無極。是內體既無。外用何有。
猶夫吾人內無靈心。外用何施乎。謬云。太極能分動靜。生陰陽。立兩儀。是萬物肇
造於無形之至無。非肇造於至靈之上主。如樹無根。竟可結實。泉無源。竟可放海
矣。有是理乎。以此立論。不惟與古經書所稱上主爲萬物之原。化生天地。宰制羣
動之實義。大相懸殊。且與釋老以空無爲宗。天地人物。皆從空無而有。同一見解
也。試問空無者。並已無有也。何以爲萬有之原。徧觀宇內人物。莫不以有生有。決
不能以無生有也。今按無極之名解之。無極者。不過云至極之無耳。何以無之至
者。竟認作萬有之原。謂其能生萬有乎。

諸儒云。太極非他。卽理也。氣雜而理純。氣頑而理靈。氣不能生天地萬物。而生天

第五篇辨理非萬物之原

地人物者。理之能也。按此則又謂理爲天地萬物之原矣。凡云理者。不當云萬物之理。當云理之萬物矣。世上豈有此顛倒錯亂之稱乎。孔子曰。人能弘道。非道弘人。誠以人心有靈。而道體無爲耳。諸儒又云。言性不言氣。不備言氣。不言性不明。是明知理不離氣。氣不離理。二者在物。固渾成一體而不相分者也。而他處諸儒又云。理在氣先。氣居理後。立言總無定準。雖云如此。畢竟理與氣實同一體。不能或分。如吾渾言人。原不相分。究之人各有等。或爲君臣父子。或爲夫婦昆弟朋友。或士農。或工商。種種不一。今但論一理。原不相分。究之天下萬物。各物有各物之理。不容或混也。如天地有天地之理。日月有日月之理。金石草木有金石草木之理。誠秩然不容紊亂者。是故吾雖渾言一理。然渾言之理。不過在吾言論間耳。並未嘗實有此渾然之理居於何處也。若然。則言論間之虛理。既屬無有。何能生萬

物之衆有乎。乃因不知萬物俱由造物主而有。卽云理係實有。萬物皆由之而有可乎哉。渾言之理。卽如渾言之人。其實並無此渾言之人。此渾言之人。亦不過在人言論間耳。若切指某人。則俱有分別也。今旣無此渾言之人。亦無此渾言之理。欲詳言此理。當據各物之理。切指某物。條分縷析。方見分曉焉。如日月有日月之理。豈日月之理。卽能生日月乎。金石草木有金石草木之理。豈金石草木之理。卽能生金石草木乎。今種種諸物。莫不各有其理。試問此種種諸物之理。並無靈明自主。如何能預爲商酌。預爲經營。造此天地萬物。安置如此巧妙。如此恰合乎。

第六篇論陽動陰靜不能爲造物主

據諸儒論萬物之原。惟係於陰陽之動靜。所謂一陰一陽之謂道是也。蓋謂陰靜至極。陰方變陽。陽動至極。陽方變陰耳。如此則是將陰靜作陽動之所以然。將陽

動作陰靜之所以然。如此則昏暗亦可作光明之所以然矣。試問氣本屬頑質。靜了一次。倘其外無有動之者。氣必永永不動矣。何可云陰靜至極。復自能動乎。○日屬陽。數千年來常動不靜。地屬陰。數千年來常靜不動。何以太陽之動。數千年來不靜。大地之靜。數千年來不動。試問月非太陰乎。何以與太陽彼此運動。永永不息乎。○據諸儒論天地萬物之原。不過云氣之一動一靜耳。試問吾人奔走坐歇。固係兩股一動一靜矣。然豈無一心爲兩股之主宰。令之動令之靜乎。今謂氣一動一靜。化生天地萬物。竟無造物主命氣或動或靜可乎。○譬一良工。造一渾天儀。具天地形象。其中日月諸星。按時而動。宛如一小天地。倘謂此小天地。係理氣忽動忽靜所造。人必共非之。况此天地高厚。七政運行。萬物以生以育。其巧妙非但難以言傳。亦不能以意會。安得云陰陽之氣。一動一靜即能生此乎。○譬如

文人書寫多字。排律而成一篇絕妙文章於一幅紙上。後將此字剪裁零星單字。雜貯囊中。復將此多許單字。亂擲於地。孰謂此多許單字。自能動靜。自能排列。自能接續。復與原文無異乎。今氣之頑然。與字之頑然無殊。零星單字。不能一動一靜。復成原文之精美。而陰陽之氣。又何能一動一靜。自成天地萬物之精妙乎。○任吾子言理言道。言太極。太虛。太乙。太和。陰陽。四象。認作萬物之原。然俱係頑然。並無靈明。卽如任子云房室之原。或係理氣。或係道。或甄瓦木料。或恰合規矩。或便人居寢。總皆頑然無靈耳。定有良工運其靈思。用木料巧爲綱繆耳。按此則造生天地萬物。更賴有造物真主。用其全智。巧爲造成也。斷然矣。○凡造一物。必有一物之理。但此理非物自有是理也。乃係靈明者心中之巧思。造此物卽命此理。具於物中耳。乃諸儒論萬物之原。又云氣之理。卽是氣。氣以成形。理亦賦焉。理賦

則萬物各具其體。卽各得其用矣。殊不知氣與理。同屬頑質。並無靈明。蘊巧思。試問果係孰造此氣。孰定此理。使萬物各成其體。各適其用乎。是必有造物主造此氣。定此理。而後方能如此也。

第七篇論陰陽受造並非無始自能生物

後儒曰。良然。氣屬頑質。果不能安排造作。自生天地人物。允係造物主無窮能智。裁成肇造無疑矣。但造物主用氣造成天地人物。所據者不過現在混沌之氣。猶夫工人造作器具。所據者不過現在物料耳。諸儒謂混沌之氣無始者。大概以此。

先儒曰。謂氣無始。非係受造。竟謂造物主造天地萬物。但由氣不由己。猶夫工人製造器具。但由物料。不由工人矣。如此是不認萬物主具全能。獲罪上主。可勝言哉。○造物妙主有超然。非人所可思議。蓋萬物主之有。實係自有。不由他有。故有此。

主之命。則天地萬物一齊均有。無此主之命。則天地萬物一時全無。因其福德圓滿。由內而出。非倚他物而立。後儒竟云陰陽之氣。居於天地萬物之先。此言大非。蓋既爲陰陽。便有形體。實係上主所造。並非先有此太虛之氣。立於何地。無方所。無定名也。以此而知太虛之氣。定然有始矣。○氣頑而神靈。可知神超氣上矣。今超乎氣上之靈神。且係受造。何況氣乎。

後儒曰。中國經書明講宇內有一上帝。宰制乾坤萬物。令之各得其所矣。但此上帝。卽爲造物主。天地萬物俱係此主從無造成。中國經書並未發明。子宜據實指明。以擴前聖所未發可也。

先儒曰。中國經書稱上帝爲造物主者。不一而足。子未詳察。故不覺耳。易經或問曰。上帝者造物之主。易經註疏曰。上帝者生物之主。稗編曰。上帝者造化之真宰。口

義曰。上帝者生物之宗。日講曰。上帝者生成之宰。想三代以前。古經定然全備。上主之稱。必彪炳人間。迨秦火而後。古經廢缺。所存者不過斷簡殘篇耳。安能使上主之稱。無稍遺漏乎。

後儒曰。子謂天地有始。係上主所造。此言眞實。無容置喙矣。或曰。自開闢以來。至於今日。尙未滿一萬年。不知造物主造此乾坤萬物。何故如此遲遲乎。

先儒曰。此正見天地有始。不能無始之明證也。吾人聰明有限。雖不能推測造物主。或早或遲之深意。但無論何時造生天地。亦必問之曰。既云造物主無始。何故遲之又久。然後始造乎。既有如是之間。必有如是之答。何必徒廢辭說。

後儒曰。既云上主全美無缺。所造天地萬物。亦必全美無缺。方與上主相稱。今觀天地萬物。何故皆有欠缺乎。

先儒曰。觀天地萬物。皆有欠缺。正見天地萬物。俱係受造。非自有者也。慎勿分此心而拜塊然之天爲乾父。敬頑然之地爲坤母。惟萃一己之心思。欽崇此萬物真主而已矣。

後儒曰。子謂上主能從無氣造成天地人物。論有根柢。無可置辨矣。但謂此上主係自有。無始無終。此理超人性靈。孰能知之乎。

先儒曰。上主無始。因其性體妙有超越。出人性表。不可名狀。安能推測其於何而始乎。今無待遠求。卽近在一己。其本性畢竟何如。尙難透達。下如蜂蟻微蟲。其妙處何以如此。亦難明見。乃欲明造物主無始之性體爲何如。縱枉費心思。又焉能測其萬一乎。

後儒曰。據此則孔子繫易。云易有太極。是生兩儀。兩儀生四象。四象生八卦。畢竟何

謂。

先儒曰。孔子明智絕倫。中國儒者。羣驚爲古今所未有。且孔子繫易。草編三絕。然後易成。是深契乎易道者。莫孔子若也。蓋其契之也既深。故其言之也必切。况抱道當躬。情慤濟世。誠恐天下後世。迷亂真宗。昧失本性。於列國諸侯間對之際。及羣弟子論辨之時。往往推本造物爲達道之本。確指人性爲行仁之根。豈肯爲含糊之語。囫圇圈圖。但指太極爲無始之元。造物之主。致萬世而下。惟知易有太極。而不知宇內有真正造物主乎。以是知孔子深明未有天地之先。有一上主。全能神智。從無而造此太極之氣。命之一動一靜。而生兩儀四象。八卦庶類也明矣。今逆而推之。庶類生於八卦。八卦生於四象。四象生於兩儀。兩儀生於太極。雖有精粗之分。實無異同之別。蓋同一頑然之氣耳。然此論蓋頑之天地萬物則然。若夫人

則大不然。其形軀雖等物類。而靈性實造物主從無中特造之神體。超越物類之上。爲萬靈之君。物類之主。而天地萬物。乃上主所造萬民一大公室。使之安居樂業。休養生息者。蓋造物主係吾人大父。慈愛吾人至極。故備物以養。有加靡已。如此也。譬人起造一所房室。而此人明智之中。必懸想如有一渾然之氣。居於房室未成之先。此氣無可稱名。卽所謂太極是也。由此氣而生水土兩者。卽所謂兩儀是也。復由水土而生磚瓦木植。遞生房室之上下四面八方。房中所用各器。卽所謂四象八卦庶類是也。造成此房。上以象天下。下以象地。四壁以象四象。八面以象八卦。屋內所陳多許器具。以象庶物紛紜。如此則人居其中。外以避風寒暑雨。內以供寢臥起居。卽如天覆地載。日月代更。萬品流形。取之無窮。用之不竭。左宜而右有也。此房如此恰當。便人居住。不言而知有巧匠居於房外。按法經營。因材造

作方能如此切合耳。夫孔子聰明高乎萬世。竟不知太極之先。定有一造物真主。能智無窮。從無而造太極之氣。由此而生兩儀四象八卦庶類。何以爲孔子。以是知諸儒謂太極無始。云太極卽是天地之樞紐。萬物之根柢。無方所。無形狀。而不推本此天地萬物。係造物主所造。皆未得我孔子繫易之深心也。

第八篇論造物主能造天地萬物。又能宰制安養令萬物各得其所。後儒曰。今觀禽獸草木。自能傳類。自能傳種。日月諸星。自具熱煖。自發光照。似與造物主無涉者。倘所謂陰陽一動一靜。自然而生焉否耶。

先儒曰。詳察天地萬物。或始造之初。或受造之後。觀其形體。恰合其性情。性情各效其形體。其妙處俱明顯。造物主能智之巧。洵非人意所能推想而得其萬一者也。蓋造物主具神體。能智無限。主張由己。迴不由他。今陰陽係形氣體屬一定。無思

慮無主張。烏能生化萬物。令之各成其形。各賦其性乎。足徵宇內惟有一至靈之上主。爲萬物之公。所以然。命萬物各具施生受生之能力。而爲一私。所以然也。譬
如自鳴鐘。內含消息轉輪。外具渾天形象。指時定刻。毫髮莫爽。然其先必有巧匠
經營。定其法則。方能如此。故良工能造之。必能制之。造制之人。乃超乎自鳴鐘之
外。而爲一公。所以然也。而自鳴鐘乃冥頑無知。不過爲一受造受制之私。所以然
耳。但良工之造自鳴鐘。與上主之造天地萬物。大相懸殊。蓋造成此鐘。而人自人。
鐘自鐘。所處之地。彼此相分。不能時保而時存。造物主造成天地萬物之後。雖不
與萬物同其體。而萬物實賴上主以宰制。不然。何以大而禽獸。小而微蟲。具覺性
者。胥有食用之物。巨如茂樹。細如小草。具生性者。皆有滋培之需。是知造物主之
神體。既能造之。又能保之。令之各得其所也。上主之能智。洵無偶矣。

後儒曰。今觀禽獸。飛啄任意。隨在各足。且喜遊大造。常有餘閑。至於人反忙忙經營。勞形力作。手胼足胝。方能一飽。不然。則嗟無食矣。由此觀之。似乎造物主待物厚而待人薄也。

先儒曰。子謂人反苦而物反樂。講解此理。誠有妙論。姑不論此。今當知上主造生禽獸諸物。並無他意。不過供人役使而已。但禽獸之性。概皆蠢然。不能明理。故於其所需之物。不能先事籌畫。決擇去取。自爲預備。因此造物主既賦禽獸以一定之性。卽定其性之所。使之有求必得。豐養其形體者。正以供人日用之切需耳。

第九篇論造物主有主張權衡及性命二字有本義

後儒曰。謂天下之事。俱有定命定數。人力無可如何者。非特今人如此言之。宋王安石每云。國家治亂興衰。及世上一切災難。俱已早定。人雖虔誠禱祝。恐懼修省。竟

屬徒勞。災難依然。卒莫挽回矣。

先儒曰。子當知上主具神智。主張由己。世上一切災難。固由上主而降。亦由上主而免。蓋降之免之。俱係上主特定耳。當日王安石謬發此違心之談。而富弼司馬溫公等。痛斥其非。明論先王爲禳災免禍。齋戒沐浴。誠求上主。因而上主鑒其誠。求轉禍爲福者。往往而然。迨後安石。酷信浮屠。拜敬佛神。恭設壇場。多請僧人。誦讀佛經。禳災免禍。痛哉悲哉。雖其中心狂惑。卒無定識。然猶見其良心尙未死滅耳。今吾人係上主所造。且賦以自主之能。而造物主更有自主。愈可知矣。豈可惑於安石之論。謂世上一切災難。皆屬早定。竟無上主宰制其間乎。

後儒曰。謂造物主無主張者。並非無因。今觀天位乎上。地位乎下。四時錯行。日月代明。微獨年年如此。且數千年來。大概如此。是其自然而然可知矣。則造物者之無

主張。似乎憑據昭然。子復何辭以解此乎。

先儒曰。當知上主之主張。動而無動。靜而無靜。生萬物而自不受生。變萬物而自不受變。性定而體住。仁存而義行。誠萬理萬善之大原也。又須知上主至仁。未嘗不至義。有時特彰義怒。降非常之事。非特使人知宇內有上主。主持世界。一切世間之事。皆非不得不然者。更以警惕人心。及時遷善改過耳。此理無容或疑。徧察中國經書。與各國史記所錄。上主特降洪水。淹滅天下。無不相同。又成湯之時。大旱七年。湯知天地有上主。故剪髮斷爪。身作犧牲。以六事自責。誠切哀禱。爰是上主震威。隨降甘霖。以蘇民困。又商王高宗。夜夢上帝。賚以良弼等種種非常之事。俱不得謂天地日月。風雷雨電。均屬自然。不得不然者。其間定有造物主特爲宰制。而不容或疑者也。蓋上主初造乾坤萬物。莫不各定一當然之性。但此當然之性。

旣由上主順之。亦由上主逆之。無不可任意自作主張也。

後儒曰。子稱上主主張中存。按此則凡所謂性命之理。誠爲上主所定。子言是矣。但

不知自古明哲所論性命二字。究竟何解。

先儒曰。凡論性命二字。須除却人爲之私意。推明上主賦畀之公理。方有定評。不然。則大失性命之本旨矣。蓋上主賦人本性。莫不各與以自主之本能。是賦之者係上主。而順之逆之者。則在人。人不過稟受上主之定命。決不能易上主所賦之定命。而自能造命也。以是知人之富貴貧賤。死生禍福。謂上主特命則可。若謂人爲之事。但逢其適然之命。適然之數。則斷不可也。蓋上主賦人以自主之權。但觀其順逆。以定人爲之善惡。至於人所行之惡。係人自主錯誤。並非上主有意于其間也。

第十篇論上主惟一不能有二

後儒曰。子謂宇內有定命定數之上主。誠哉是言也。但浩萬之物。性命各殊。紛然莫齊。倘惟一上主。安能使萬物各遂其性。各安其命乎。豈宇內有多主宰分掌其事乎。抑大主而下。尚有多神代理其職乎。不然。恐惟一主宰必將紛勞其神。肆應不暇矣。

先儒曰。子欲宇內有多主宰。以分掌其事。是欲一家有多主。一國有多君矣。亂人家國。必子之言乎。子既知一家不容有二主。一國不容有二君。愈知宇內不容有二主宰。此理明甚。何待疑乎。倘謂大主宰而下。尚需多神代理其職。是謂上主勢單力弱。能智有限。必賴百神相與補助。一如世上君王。一人不能分理。必資諸臣。承宣布化。久之必至君弱臣強。僭亂橫起。亂靡底止矣。今俯仰天地。萬物紛頃。莫不

遂其生復其性。各安上主之定命。無能改易。足徵上主能智無窮。惟一無二。無待輔助也明矣。○詳考五經。俱稱天地間惟一造物真主。作民父母。所以古先王舉行郊祀大典。皆奉此惟一真宰。以加欽承耳。後世雖莫察先王郊祀正義。兼行郊社二禮。然孔子明告世人。乃云。郊社之禮。所以祀上帝。是孔子深知上主惟一。斷不容有二矣。迨先儒既衰。後儒繼起。方立后土之說。將肇造乾坤萬物之真宰。生養吾人之大父。昧然不知矣。更有甚者。不惟立五帝。以主五方。更創太極太虛。太乙太和。理氣陰陽之說。惑世誣民。是將天地真主。全然抹煞。可勝悲哉。

後儒曰。古者天子祀上帝。徧于羣神。諸侯祭山川。大夫祭五祀。是古人所拜之神多矣。子謂宇內惟一上主。不能有二。似欲棄百神。惟認一上主矣。如此則古人所拜之百神。皆屬荒渺無憑乎。

先儒曰。我不惟鄙笑近儒論神之非。而不屑認其所論之神爲神。且痛惜近儒大逆古儒論神之實義。使萬世而下。茫無眞神可敬也。近儒論神。謂信之則有。不信則無。論有固非。論無亦非。神不過在有無之間耳。此言殊謬。不可爲訓。何也。天下之事。果屬眞實。信之固有。卽不信亦不能無也。當知天地間定有正神。亦有邪神。正神輔人爲善。邪神誘人爲惡。明理之士。必能分辨其眞僞焉耳。

第十一篇駁西銘萬物一體之說

以上所論天地人物。決非太極陰陽理氣等自然而生。定有一全能神智之造物主。從無造成。令各得其所也。今觀張子西銘大旨。謂造物主。與天地神人萬物。俱屬一體。以此立論。非特將上主之實義抹煞。且將上主與天地萬物混爲一體矣。若此則是天地萬物自生自己。並非上主造成也。夫人物果係自生。則人物卽是

上主。上主卽是人物。人有善惡智愚。上主與之人有疾病災傷。上主同之。甚至人受殘殺虐死。上主亦必共之矣。侮上主逆公理。莫此爲甚。且吾儒所以闢佛教輪廻之說。共相排擊。不容其猖獗者。謂其混人物。滅倫常。恐遺禍後世耳。今謂萬物俱屬一體。此言一倡。不惟人與禽獸木石等無殊。且將上主與糞泥等無分矣。其害較釋氏輪廻之誕說更甚。而世儒謂其妙語天開。發前聖所未發者。因未深思其謬。不過喜其文章高華。不覺而誤信其議論精妙也。

第十二篇論上主爲萬善之準萬德之原

識認上主。不得任私意懸擬。當逆私意。獨用本心之良。方能領悟。蓋人之良心。卽人之本性。雖無明師誨之諄諄。然能自明善惡。辨邪正。劃然分明。不容或昧。上主賦人本良。猶如公師然。不容人稍逆公理。而順私情。惡人雖汨沒本良。畢竟畏此。

本良糾制。不得恣其私情亂動者。往往然也。此本心之良非他。乃萬德之原。至尊上主。通其德。賦于吾人。以爲作善之根。避惡之具耳。○敦五倫。盡萬善。其根本大道。要在欽承上主。莫敢或忽耳。蓋五倫與萬善。俱向上主而爲。則理有根據。德日堅定。二者相須。不容或離。誠以上主爲萬善之準。人苟順行上主之意。則善爲眞善。德爲眞德。不然。縱使修德行善。終身不怠。譬如舟行巨海。無舵無師。何以安渡狂波。載寶物而登海岸乎。

第十三篇論上主爲萬理之原

天下之理。宜分公私兩端。公理係人心本良自然而知者。私理係一國一家所立者。私理係國家君相所設條例。令一國一家之人遵守者。公理係天地元君。賦畀斯人之秉彝。令萬世之人。所當率循者。且私理能治人之形。不能治人之神。因私

理定之人君。人君雖高居臣民之上。究亦人類耳。公理不惟能治人之形。且能治人之神。因公理定之上主。統治形神。而兼爲一主耳。私理由人君權變裁制。亦由人君率由與否。公理則無論何人何神。俱宜欽遵。無容或逆。可知定此公理之上主。洵爲宇內元君。天上萬神一大公主也。曠觀寰區各邦。地不同而風俗隨異。時不同而制度或殊。但不論何地何時。人立之私理。皆當附合於上主所立之公理矣。所謂萬理皆歸一原者此也。

第十四篇論上主爲人所向之極

仰觀俯察。萬物紛紜。俱賴吾人爲之統帥以奉事上主也。因萬類非蠢則頑。惟人獨靈。靈則必具明愛兩端。人之所明愈開擴。則其思愈高愈廣。世上之物。愈不足滿其欲明之心。人之所愛愈摯。則其愛愈求美善。天下之物。愈不能充其愛欲之

量。蓋人心之明。必向全明。人心之愛。必向全善。非全明無以滿其明。非全善無以充其愛。惟一上主。係全明。且係全善。故惟上主方能滿人心之明愛二司。而無所欠缺。不然。則人之明愛二司。俱不能充其願也。故萬物奉人。人奉上主。此係天地間當然之大序。所謂萬理皆歸太乙太和者此也。如樂有八音。而八音節奏。更唱迭和。總歸一樂。又如房屋。椽柱棟樑。門窓戶壁。件件皆全。總歸一房。又如畫圖。天地山川。人物花卉。種種皆備。總歸一畫也。按此則萬物奉人。人奉上主。是萬物非蠢則頑。惟人獨靈。物不能明上主。而人以明之者感其恩。物不能愛上主。而人以愛之者報其德。是統率天地萬物。總歸一無上真主者人也。所謂惟天下至誠。惟能經綸天下之大經。立天下之大本。知天地之化育者。此之謂也。由此觀之。人苟不統率宇內萬物。欽崇上主。乃是變美而爲醜。變常而爲亂。誠紊天地間當然之

大序矣。豈非自作孽不可活哉。

第十五篇論世人因居世多苦致疑宇內無上主解明此疑

後儒曰。人之所以疑天地無主者。洵有由來也。試觀寰宇生民。善惡不分。明明巨憝元兇。而身膺富貴。快意頻遭。且其子孫有爲帝者。彰彰豐功峻德。而現處貧賤。殃屢受。且其子孫竟至滅亡者。歷觀古今。往往皆然。以此而論。似覺天地無上主矣。

先儒曰。惡人暫逢得意。富貴終身。並非厚幸。乃上主特欲行善君子。輕賤世福。明示身後。具有真福。以賞真德。非生前世福。可勞萬一。惡人雖暫膺世福。身後具有真禍。以罰真惡。亦非生前世禍。可勞萬一。當知惡人現享世間微樂。如巨犯羈候囹圄。雖暫賜飲食衣服。聊且微樂。乃係國家額外隆恩。俟判明罪案。或斬首市曹。或

凌遲通衢。誠欲暴其罪以伸國法耳。悲夫。○徵上主至公賞罰彰著於人世。俯仰
天地。盱衡古今。皆歷歷不爽。證據無窮。如顯罰惡人。莫如武乙。被雷一事。明賞善
人。莫如虞舜。大孝先居畎畝。後降大任。統御寰區。周公忠孝克著。友于克敦。卒致
讒謗胥泯。天下共諒其心跡。稱其盛德。由此觀之。則上主賞善罰惡之公義。洵彰
明較著矣。○予以前所論人之靈性。是神非氣。並不死滅。議論雖然眞實。而理似
有缺。今當探本尋源。直指靈性之原。明白陳說。庶見根柢耳。前論是由吾人靈性
之體。推原有一上主。今當由上主之道。遞明吾人之靈性可也。誠以上主者。微特
係人心五德五常之大本。更爲吾人靈性之大原。安可不推本言之。以明我人靈
性所由來所將往乎。

第十六篇論人之靈神非氣並無死滅特賦於上主再加明釋解人心惑

人能畧明上主之性體。若何便知上主性體之超越。決知其非太極理氣之謂。乃是造太極理氣之大原。體係純神。不雜萬有也。且知人之靈性。實屬上主。從無而造之神體。肖似上主。亦非太極理氣所可言也。如此遞從上主。詳加體認。則於人之靈性。始能會悟其真解矣。前已明論氣屬頑然。上主乃純神全能之真宰。故能生人之靈性。超乎氣上。而爲一神體。彼頑然之氣。並無靈明。又何能生人之靈神。如此靈明乎。按此則人之靈性。定屬能智無窮之造物主。從無氣而特造也。明矣。夫造人靈性之上主。能智無窮。既不可謂氣。則人之靈性。具聰明。能自主。亦不可謂氣。何待言乎。○人之靈性屬神。旣爲神矣。則有而非無。實而非虛。微獨知有己。且應酬天下之事。能運精思。轉變無窮。今氣與係氣諸物。雖非虛無。亦係實有。但頑而不靈。故不能知有己。且動靜之間。皆係冥然。並無知識。故不能推知其所以。

然而得至善之歸也。惟上主係自有者。乃至實至有萬有之根源。造氣與屬氣諸物。皆係純形。造人乃兼形神兩者。形肖萬物。神肖上主。上主爲自有之有。人肖上主之有以爲有。較之萬物屬氣之有。豈非超然而特出者乎。

第十七篇論上主至公無私賞善罰惡毫髮莫爽可見人之靈神無死滅世間暫樂。不惟與善人之德不稱。且大非吾人本性真福。更能引誘吾人喪厥本良。况乎君子蒙禍。小人蒙福者。古今來屈指難更僕數。是知身後必有上主所賞真福。厚酬君子之真德也。○上主全善。所賞善人之福。必與上主之全善相稱。較善人在世所積之善。必萬萬超出。不止副乎其善而已。至于世上一切福樂。不過養人貪財恣色驕縱復仇等惡念耳。安可據爲真賞乎。蓋身後定有上主無限真福。報善人修德之實功也。○人苟克修實德。必常畏人知。是爲不顯之德。德行之

尊品諸德無以復加矣。如此德行必落落寡合。盡人莫知。是德行愈隆。而世報愈寡矣。且世間賞罰往往不公。或罰惡而遺善。或錄才而棄德。或旌揚外著之德善。必致鄙薄中藏之實修嚴罰極刑。所以誅兇人而罪溢五刑。罰有餘辜。高爵厚祿。所以酬德士而德邁三公。賞有遺善。况乎秉法者逆公理順私情。竟致善惡不分。賞罰不明者比比然也。試觀功名蓋世而不矜不伐者。每致淪落以終身。勤猷偶著而自誇自飾者。竟邀虛聲于一世。可知世報皆僞定有身後實德之真報也。

第十八篇論世福有缺不能充滿人心足徵人之靈性決無死滅

凡人生子未有不願其子福樂終身者。雖力有不足而經營籌畫不畏艱苦。或留功名以蔭其嗣。或謀財貨以安其身。凡力所能致者。莫不畢慮竭智以圖之。微獨王親之本分宜然。實發於父母之本性自然也。蓋此念乃上主所賦固有之良。不

待勉強。不得不然耳。今上主爲萬民公父。其欲萬民共享常生真福。以遂其本性。較二親之篤愛其子。更爲急急可知矣。吾人寄形宇內。不過百年。有盡之形軀。小體。上主且備萬物以養之。無少欠缺。何況人之靈性。爲人大體。竟致饑餒其神。而空乏其靈。是上主能造之。竟莫能養之矣。且重人小體。輕人大體。吾知至仁至義之大主。決不忍出此也。則以常生真福。切報人之後。理所必然。無容或疑矣。○凡人本心。莫不願得真樂。若身後並無真樂。以遂其心願。反不如本無此切望真樂之心。尙能使人心安然無慮也。倘有此心而不得遂。則人心之憂苦。莫此爲甚矣。蓋旣不獲真樂。必求世上之僞樂以解之。無如人心喜新厭舊。每想奇景佳地。思有以適耳目。愜心志。卒至換一景。樂未幾而新復如故。遷一地。居未幾而厭又隨生。謀之終身。必無快足之一日焉。卽極之尊爲天子。富有四海。玉食萬方。臣服

宇宙聲色貨利。左宜而右有。然形體脆弱。漸就衰殘。七情熾發。無時寧靜。喜日久。則日厭。樂日久。則日煩。且名利在念。妻子營心。是故動猷茂著。妻子姣美。不覺顧之而色喜。及至功名頓喪。妻子死亡。其慘戚悲傷之狀。洵有不可以言語形容者。徧觀世人。自生至死。其形態莫不皆然。可慨也夫。夫上主賦人恒性。原令人求得常生。切想真樂也。乃全受世苦。究無真樂。是上主生人於世。徒曆多苦。勞瘁一世。竟無底止矣。此豈合夫上主至仁至慈之實義乎哉。○謬謂人之靈性有死滅者。並無半點確證之可憑。若予之所謂靈性無死滅者。洵有多端至理之足據。且畧舉五端以論之。一則人之靈性實無死滅。妄謂有死滅。所關甚重。假令人之靈性。卽有死滅。今云無死滅。所關甚輕。二則生人之本性。常畏死而貪生。今謬謂人之靈性有死滅。非出於本性之自然。乃係順私欲之妄談耳。蓋本性之良。確知身後

定有賞罰。止因生前放恣于惡。無所不至。恐云身後定有賞罰。則永難脫離。故與其謂身後有賞罰。莫若云人死其靈性全滅。而生前可以任我所爲。毫無忌憚矣。三則謂人之靈性無死滅。此道相傳人世。甚益君子修德之心。深阻小人悖德之念。四則謂人之靈性有死滅。即是謂宇內無赫赫明明之上主。降祥而降殃也。況謂人之靈性有死滅。即是疑上主不公。疑上主不公。即是不信宇內有上主矣。五則上主全善至仁。爲萬民共父。願人永享真福。乃其本性自然也。今偏觀宇內生民。人人皆苦。並無真樂。若謂人死而靈性隨滅。終無真福。爲此言者。即是謂上主非全善至仁也。觀此以上所論五端至理。謂靈性無死滅。較之謂靈性有死滅者。其眞據不誠。昭然莫爽哉。况乎謬謂人之靈性有死滅。其言終無一據乎。

第十九篇明辨性理諸書謂天下之物不論靈蠢俱有始終之說

後儒曰。子言誠是。但性理諸書乃云凡此天地人物俱有始終。今人之靈性既云有始矣。據彼所云。則人之靈性亦必有終矣。子復何言。

先儒曰。所謂有始有終者。乃彼此相雜。有所妨害故耳。如人之形軀。具有元濕元熱兩件。二者乃相雜不容相勝者。有一盛必有一衰。如火勝水。則水衰而火盛。水勝火。則火衰而水盛。相攻既久。力不能支。此死滅所由來也。今人之形軀有死滅。因其有水火等情相雜。故有始終耳。若人之靈性屬神。並無二者相雜。義不受尅。且能制氣。不受其侵傷。此人之靈性所以有始無終也。蓋上主爲靈性共父。造人靈性。賦以常生之念。極願其常生而享全福。今世福微暫。迅速如電。善人功高德峻。上主豈忍以此虛幻世福。暫賞生前。致令善人徒存真福之想乎。夫上主賦人自主。既能改過而遷善。賦人本良。又能修德而立功。然而曠覽古今。君子艱難困苦。

小人暢樂自適。往往皆是。觀乎此。正見上主鍾愛人靈。不令死滅。身後定有真正賞罰。憑據昭然矣。

後儒曰。子云身後之賞罰。永無改易。洵足勉人修德。戒人爲惡矣。倘或身後賞罰。或有未眞。將吾人在世。苦身克己。進德修業。盡棄世間之虛樂。切望身後之眞福。而身後卒無眞樂。如此之人。非特可憫。且屬徒勞矣。奈何。

先儒曰。身後之賞罰。此道昭著人間。能令惡人有眞禍可畏。時加警醒。莫敢縱其逸志。能令善人有眞福可望。愈加奮勉。更足慰其苦心。此理予以前剴切講明。決其必有。無容疑惑矣。譬如子心。尚有疑惑。吾必深信之。信之既深。行之必篤。微獨非義之樂。吾決意斷之。且合理之樂。亦常思淡之。而不稍窒心中。蓋恐於理偶有過差。致干上主之嚴罰耳。子心疑之。必將縱慾偷安。放蕩無忌。無論所樂之事。合理

與否。皆昧然不關重輕焉。吾兩人如此存心。是一信一疑。兩相悖戾。各從其是矣。
假令人死靈性亦死。子固不能笑我所信之徒勞。我亦不能笑子所疑之或誤。因
子之所樂已過。吾之克苦已往矣。倘生前所行善惡。身後定有賞罰。子之真禍忽
來。吾之真福必至。皆永遠無窮。斯時也。一膺真賞。一受真罰。吾深嘆子之疑惑。錯
謬殊甚。而痛惜悼恨靡已也。悲夫。

性理真詮提綱三卷

遠西耶穌會士孫 章德昭氏述

靈性之道 目錄

第一篇發明真教總義

第二篇論但守五倫不足爲真教

第三篇論宇內當有真教

第四篇論真教惟一不能有二

第五篇論真教惟上主所立

第六篇論上主真教與世永存

第七篇論真教實義聽人考察

第八篇論考察真教當據何法以明其爲真教

第九篇論真正異端在於不認真教

第十篇總論異端之非

第十一篇駁漢唐以來性理一書諸謬說

第十二篇論今之明儒識見雖高議論雖正但與真教之理尚有不足處

性理真詮提綱 三卷

遠西耶穌會士孫 章德昭氏述

靈性之道

第一篇發明真教總義

後儒曰。今聞天地間惟有一至尊無對之上主。無始無終。無聲無臭。全能全智全善。實爲肇造天地神人萬物之大元。又云人之靈性爲上主從無而造。有始無終。不死不滅。生前善惡。死後賞罰。大哉論乎。斯其至矣。予不能不心悅而誠服矣。蓋此兩端至理。最關緊要。洵爲諸道之大原。萬理之根柢也。倘無此兩端至理爲之綱維。皆虛而不實。浮而無根。雖終身由之。必不能積德修善而獲真報也。曠觀今古。立教多門。然其所以立教之宗。非謂理氣。卽云太極。非談空。卽說無。所論賞善罰

惡俱在現世。所論天堂地獄。不但與上主至公之義相悖。且與人靈性之實義。亦大相刺謬。詎得謂探本尋源之真教乎哉。嗟乎。中心搖搖。竟弗能決擇一教以爲指南矣。將欲舍教以立身。又恐爲人所譏。今已矣。吾守五倫以盡人道可也。

第二篇論但守五倫不足爲真教

先儒曰。子遵五倫以盡人道是已。當知五倫之道。賦於上主。盡五倫而不推原於上主。是循其末矣。而探本則未也。夫豈可哉。蓋國家有五倫。盡五倫於世上之君親。則家有孝子。國有忠臣。然後世上之君臣父子相通。家齊而國治矣。六合有大倫。盡大倫於天上之大君共父。則宇宙多仁人。寰區多義士。然後天上之大君共父。與吾人相通。乾坤內外之真教彰矣。吾人必互相維繫。方得相通。苟人與人不相通。則世道悖違。人事乖亂。人與上主不相通。則生不知其何所來。死不知其何所

往現在所行。究不知其何所爲也。由此觀之。盡大倫於上主之前。不較盡五倫於人之前。更爲吃緊乎。

第三篇論宇內當有真教

邪說橫行。壞人心性。執真教之理。提撕警覺。如人身染瘋狂瘟疫等症。語言行事。紊亂失序。雖以正言誨之。諄諄令其醒悟人事。無奈其病已深。徒勞無益。非遇良醫。施以善劑。除其病根。則其病愈染愈深。不陷於死亡者幾希矣。今二千年來。異端雜出。逆理亂常。迷人心志。害人本良。中國儒者。雖具一己之論。闢異端之非。令其遷改。卒不能變其邪心。歸于正道。何以異是。悲哉悲哉。當今之時。正宜講明真教。確認上主。直指乎降祥降殃之顯赫。申明夫賞善罰惡之大權。斯邪正立見。真僞昭然矣。蓋真教能治人身。兼治人心。外而規矩嚴肅。秩然不紊。內而誠意懇至。

肫然弗移。苟真教之是遵。則旣明宇內之真主。又明真正之賞罰。而邪教自然熄止矣。蓋吾人私欲日深。情好日偏。富貴淫其心。安逸蕩其志。異端邪說又從而蠱惑其性靈。是故驕奢淫逸。無所不至。放辟邪侈。無所不爲。心如病狂。豈不然哉。不有真教實理。誨之改遷。何以拔人心之陷溺。超乎萬物之上。使之卑視自己。而欽崇上主乎。○真教如太陽。光照萬方。行路者依此光而行。必不失蕩平之路。致有岐路之悲。無真教。微獨修德無真向。且遵道而行。半途而廢。易入歧途。而無貞固之守。有真教以爲之準則。則心志光明。規誠嚴密。修德有輔翼之方。進業有勸勉之道。有罪愆則遷改有門。避惡風則防備有法。倘無真教。修德進業。皆不能合乎中庸之道也。蓋修德如射。失諸正鵠。射雖工。何_成于_事乎。

後儒曰。上主係宇內共主。天地元尊。欽崇之道。宜萬國相同。不可有二。乃起視斯世。
異端雜出。不啻如敵國相爭。戈矛相向。仰維上主。乃萬真之原。愛真而惡假。必大
發慈惻。決不忍人世以虛僞相將。彼此仇對。定立眞實之禮。使人從中分別眞僞。
如太陽當空。而眞僞昭然共睹。豈肯使僞教亂眞教乎。

先儒曰。然眞教惟一。原不容僞。教雜乎其中。原其初固定實理法程。分別眞僞。使人
遵守。徧考經書。證據鑿然。迨後人心不古。喜新厭故。邪教紛出。而眞教方晦也。蓋
上主初造人類。兼有二者。一屬神。一屬形。二者相較。神重而形輕。萬物所以養形。
眞教所以養神。養形者已全備無缺。而養神之眞教。或有缺焉。斷無是理也。是故
開闢之初。眞教之傳。已燦然明備。無纖毫缺略矣。夫眞教爲人而設。無人則無教。
有人則眞教卽昭明於世。以是知上主乃造人之大主。立教之公師。人係上主所

造教係上主所立。然後教爲真教也。必如此吾人存心養性。夭壽不貳。修身以俟之。方能生順死安。復命歸根。而無遺憾矣。不然。真教不明。邪教日盛。何以返上古真教中正之實理。滅異端偏謬之妄行乎。蓋真教者。乃先儒相傳上主所立之古教也。凡有新說。皆今人所立之異端耳。○夫事始於今。理始於古。真教之理。乃中庸至理。自開闢已然矣。是真教之行。世世相承。未嘗或替。當開闢之時。定有上主所生之人。上主已將此真教之理。諄諄告飭。不啻耳提面命以傳之矣。以此而論。則佛老之教。理氣之說。太極陰陽之論。以及太乙太虛太和五帝等論。昉于何時。皆有歷朝年月可考而知。其非上古相傳之真教。不誠彰明較著乎。

第五篇論真教爲上主所立

真教之理。純粹精微。全備無缺。惟全能全智之上主。方能立之。非惟聰明才智之

士莫能定之。卽盛德絕倫之聖人。教思無窮。愛人無已。終限於能智不足耳。是知
天地係上主所造。人係上主所生。真教亦係上主所立。無疑矣。○人心有靈。靈則
能推明乾坤之內。有一上主。加敬加畏矣。然上主尊貴無上。必舉行何禮以展其
恭敬之誠。非有真傳。未能盡知。又人之靈性。永存不滅。死後定有真正賞罰。賞善
人以如何之福。罰惡人以如何之禍。且欲獲此福。當修何善。欲免此禍。當避何惡。
此係造物主之玄旨。其理幽深莫測。超人靈性之上。雖因天地間有形之物事。極
力推究。奈人之聰明有限。不過知宇內有上主。必不能透知以上所云上主立教
之玄旨。畢竟何如也。又獲罪上主。上主或赦與否。卽赦矣。當行何禮以補前愆。苟
得重罪。上主果寬其既往。與以自新之路否。種種諸疑。理奧義深。俱非人之識見
可以推明者。是知惟有上主所立之教。至真無僞。本末兼該。始終一貫。透切講明。

以上諸理。方能使人心醒悟。知上主生人於世何爲。知吾人作何修爲。始能與上
主心相契合。永久不離也。○人未有不好善而惡惡者。是人性本善可知矣。然而
好善而善不加修。惡惡而惡不定改者。豈非人之靈病日深。以致私欲蠹我心性。
不克自振拔乎。孔子教人克己。大學教人明明德。是明知人之明德爲靈病所拘。
私欲所蔽。喪其本然之明德矣。不然。孔子教人克己。大學教人明明德。不皆爲多
事乎。語云。從善如登。從惡如崩。是人性已壞。更可知矣。如人形軀本來壯健。但染
寒熱等症。厭膏粱而甘酸辣。非膏粱不足以悅口。身之病累其口之味也。上主全
智。能察人心之隱惡。故立真教。施以應症之神方。則私欲雖勝。無所容之矣。○上
主賞罰。原不專在現世。世人不解此意。謬謂作善未必卽降百祥。作不善未必卽
降百殃也。且謂惡人操行不軌。專犯忌諱。悖棄彝之良。滅倫常之道。本身福壽綿

長。且其子孫有爲帝者。善人積德累仁。幽獨無欺。仰焉而無愧。俯焉而不怍。反致生前患難。叢集死後雖留空名。無補實行。然觀乎此。正見定有上主所立真教。慰善人之苦行。使其愈加奮勉。以邀身後之真賞。警惡人之肆志。使其莫敢縱慾。以免身後之真罰也。史遷不達造物主之玄旨。而怨尤終身。以致獲罪上主。可勝悼哉。○吾人居世。未有不求福避禍者。但未識真福何在耳。故求長生者。辟穀延年。干利祿者。患得患失。妄謂真福即在斯世矣。嗟乎。茫茫宇宙。不啻如石火電光。倏忽莫定。豈真福處所耶。故上古聖賢於人世福樂。浮雲視之。敝屣棄之。漠然不以動其中也。當知人性已壞。私欲深而性光蔽。但知生前浮淺之事。莫悟身後玄奧之理。此真福之理。惟上主所立真教能講明之。至於人立之教。如釋教所講善惡因果等異說。大壞人心。悖理實甚。烏有所謂真福哉。○萬象森布。供人使用。俱與

人之形體相須。如目之於色。耳之於聲。件件相須。莫能相離。若然則人之靈神。肖似上主。與上主之美善全福。其相須處。不更切乎。上主至真誠。至美善。人有聰明。以向其真。有心思以向其善。上主至威靈。至慈惠。人有敬畏以凜其威。有本良以報其德。且上主至公明。人有自主。能改惡遷善。邀其仁恩。回其義怒。因靈性之學。兼死生之道。備形神之理。語大天地。莫能載。語小天下。莫能破。此惟上主始能立之。人雖明智。孰能推知其所以然。自定所守。倘非上主特立真教。誨之諄諄。安能與人性相稱。坦然由之。而無他岐之惑乎。

第六篇論上主真教與世永存

後儒曰。真教典禮。湮滅失傳。其來已久。諒天下各邦。與吾中國。所存者不過真教之影。而真教之全。未得聞矣。

先儒曰。仰觀俯察。衆庶繁生。各相戕賊。如火滅水。水滅火等是也。然上主全能。旣生之。必保之。莫不令之各安其位。各遂其性。決不致彼此相戕。殄滅無存矣。上主保存物類。尙如此周全。况眞教之存。關人性靈。至深且重。豈容異端之學。得而大亂其真乎。是故眞教之傳。布在寰區。流行萬世。滅于此國。彼國必確守勿失。失之于彼國。此國必篤信無疑。是知眞教永存斯世。如天覆地載。無時蔑有也。○歷考史書。上古之世。人盡遐齡。不似今日之短促。微獨中夏如此。各國經書。莫不云然。因上古人稀。上主令人壽高年長。欲人類蕃滋。奉事上主。確傳眞教也。且爲古初方策不備。書教未興。欲人類胥臻上壽者。所以補無書之缺。使人口傳眞教。不致遺亡耳。觀乎此。則上主保存眞教。其用意不亦深哉。

第七篇論眞教實義任人考察

後儒曰。子謂上主保存真教。永存宇內。不令泯滅。立論確實。其說信然矣。但真僞並行。邪正難分。將何所區別。使真教昭著于普世。令人人共曉乎。

先儒曰。上主真教。無論行于何方。所立規誠。莫不合人本性。所行之事。並非拂逆人心。強人必爲也。蓋良善慈仁。謙恭忍耐諸德。本乎性靈。上主所立真教。不過因此而利導之耳。是故人于真教。必當詳察其實理焉。蓋察而後明。明而後信。信而後行。久之則習。與性成。道與心合。中心悅之。有不可以言語形容者也。邪教不然。不令人明之。必強人行之。蓋邪教原係人立。索隱行怪。欺世盜名。不惟難明。且隱僻詭異。恐人明之。即不願從之也。真教乃上主所立。根據鑿然。本末一貫。愈明則愈知其美。愈察則愈服其真。倘立教不許人察其根柢以定從違。觀此踪蹟詭密。其爲邪教彰明較著矣。是知上主賦人良知。正爲考真教以奉守。察僞教以拒絕耳。

耳。人有聰明，安可誤用乎。○倘設教而分疆域，論爾我，別貴賤智愚，便非萬民共父所立之真教也。真教乃宇內公教，無論貴賤貧富智愚賢不肖，皆可以與知與能。且真教迪人行善，諸德咸備，或行法以俟命，或以德而報恩，信上主之真威，欽承無懈，凜上主之昭察，戒懼時存。君子修德，刻厲功深，舉真福等理，以慰其旣往。小人縱私，日就汙下，舉真禍等理，以警其將來。故萃宇內人士，不論男女老幼，俱可超凡而入聖，亦不論善惡智愚，皆可改過而從新。總由真教大公無我，故人人皆能成聖成賢，決不使一人有失望之悲，致擯棄于真教之外也。○上主萬德全備，萬善兼該，洵美好福德之大原也。若然，則上主愛好本體之全美全福，必出于本性之自然，雖慈愛吾人，有加靡已。原以感動人心，使之信認己性之尊貴，茂加福德，無限敬慕，時存順其旨，莫敢違其命耳。此則令人心存誠敬，欽崇上主，內盡

之實禮也。若有人焉。深悟上主尊高無極。仁恩無盡。口頌上主之美。躬行教理之
真。必視四海之人。皆我兄弟也。苟見宇內人心。迷惑異說。未信上主而欽崇之。定
大傷上主之仁心。獲罪上主靡極。奉行真教之人。返之于心。誠有怵惕難安者。故
不避風濤。不畏寇險。經食人啖人之國。敷傳真教之理。使認上主至尊。欽崇無貳。
改過自新也。倘有時偶獲罪於上主。必痛自刻責。補全無缺。然後始安。或嚴齋。或
誦經。或席地枕石以苦其身。或靜默深思以防其懲。種種補過之工。惟懼有負上
主之深恩厚澤耳。不然。則心中之懊悔。誠有不可以名言者。此則令人敬奉上主
外盡之實禮也。以上所論真教內外兩端實禮。皆由本心之良而發。不得不然者
也。

後儒曰。據予所論真教之理。如此全美。果在世間。人人皆宜信之。據此則遵從者必滿寰區矣。然徧考諸夏。遵從者果係誰乎。

先儒曰。吾以上所論真教之禮。原本昭著。義理精當。予苟按理推求。果在人世。決無可疑矣。雖然。譬之懿美當前。人人極口贊頌。然贊頌者多。而實效其德者鮮矣。既不實效其德。必將深惡其德。于是妄肆排擊。誣端人以朽名。毀貞士以污行者。往往皆是。人之于真教也亦然。真教奉一上主。傳教淑世。關人性靈。洵非淺鮮。無奈人心舊染已久。深惡真教談理切實。不稍隨俗。于是變法以傾之。設計以壞之。必使真教不容于人世。然後其志方慊。是故真教之理。超人性靈。廣博難窮。究係盡人當信之正理。乃反笑其不經。疑其虛誕。奈之何哉。

後儒曰。我于真教不然。察其理固真。定奉守弗追也。

先儒曰。其然。豈其然乎。今察天下各國之人。其本心俱有錮蔽。子雖高士。邁越人羣。然而倫風之染人最易。子卽明知真教之實理。亦若視而不見。聽而不聞矣。

後儒曰。是何言哉。

先儒曰。子勿怪。子論涉于激切。祇用一言。子卽明釋吾論之果然也。如中國書籍。講明大地本係圓形。只因古書云天圓地方。久信于心。雖有新書作證。猶必云天圓地方。人心固蔽。牢不可破。以至如此。可慨也。夫今性理諸書。論人道未嘗不井井有條。至于談人道之所以然。非主太極。卽本理氣。竟將上古相傳。維皇上主。降衷下民。監觀人心。毫髮不爽之真理實學。悉削不道。何怪下愚不移之輩。自暴自棄。妄執氣聚則生。氣散則死之說。妄想世樂。致利祿薰心。美色溺志。往而不返乎。嗟乎。以如此之世。侃然而談上主所立真教。如人身發毒瘡。欲操刀盡割其糜肉。必

諱疾忌醫。不任受其疼痛也。是故信從真教。非滌去夙見。虛其心以納天下之公理。究莫知真教畢竟何如也。蓋真教本係天下公理。人不論遠近。地不論遐邇。當以是非爲準。方知真教之實理。倘以其傳自外邦。便私心鄙之。固執不信。豈天下之公論乎哉。

第九篇論真正異端在於不認真教

後儒曰。雖然吾中國古儒所傳之教。寧非真教。中國之人。守中國古儒所垂古經之遺訓足矣。何必復信子所謂真教乎。

先儒曰。語云書不盡言。言不盡意。即使中國古經全備無缺。亦不能將乾坤內外之大道精義。畢陳無遺。况經秦火之殘烈。王莽董卓之焚燬。古經大受其凋殘乎。真教之理。原存古經。但古經殘缺。安得謂真教之理。全具古經乎。試卽古經考之。雖

存什一千千百。猶足啓迪人心。以明真教至理。但註釋不無晦明耳。欲達古經立旨。須將本文詳加體認。方有領會處。倘以小字討生活。吾知其于本文必一字不通也。○漢唐宋以來。諸儒意見不同。講解古經。議論各別。獨出己見。莫據真理。以此古經失傳。晦處甚多也。苟因幾端真教之理。不顯著古經。即謂其非真教。豈千古定論乎。今釋教誕妄。不可枚舉。立說陳辭。大悖古經。加以左道之名可也。真教原與未經失傳之古經若合符節。乃惟以古經失傳。真教之全。現在不備載古經。卽以異端目之。夫豈可哉。何爲異端。與上主所立真教之理。適相刺謬者是也。論人之良知。自能知異端之非。但堯舜歿。孔子之道衰。邪說代作。中國人心之蒙蔽。日甚一日。雖明明真教當前。必棄之如遺。而輾轉牽就于異端中矣。爲今之計。當何如哉。真教既係生人當緊之道。宜據本心之良。撥開舊聞。獨抒真解。知異說皆

非。惟真教具生死大道。迫切求之。始能有得。倘不據本心之良。悠忽從事。必俟得
有真傳。方肯信從。則嗟無及矣。○或謂異端之謬。大壞人心。迷失真跡。上主何故
任其縱橫人世。不卽絕滅乎。不知真僞並行。而察識真教者必難。難則由邪反正。
其見必真。其守必定。而其功亦甚大矣。且世上美善。非苦其心志。勞其筋骨。不能
有成。况真教係吾人性靈根本切圖。若非苦心焦思。極力窮究。豈可安坐而得。如
金剛石寶物也。生於石山之心。韜光匿彩。不與凡石爭輝。人欲求之。非穿石莫獲。
若然。則上主欲人詳察異端之刺謬。以明真教之實理。豈不然乎。

後儒曰。子所論上主所立之教。如此其真。凡人俱當信從固已。但予惟確守本心之
良。非理不行足矣。何以教爲。子所謂真教。卽不奉焉。有何罪過。上主豈遽罰予乎。
先儒曰。子言非是。倘朝廷諭旨。旣已頒行天下。無論知否。違之者罰在必行。予以上

所論上主所立之真教。既已宣布人間。至明至著。人心有靈。自能覺之。今子乃師心自用。不殫精竭慮。極力窮究。猥云但守本心之良足矣。惡得無罪。夫真教係上主親立。人不信從。如人子身染疣痏。其母具良藥以療其疾。且再四迫之使服。無奈其子抱疾以終。寧死不服何也。若然。則其子因病而死。咎在母乎。咎在子乎。

第十篇總論異端之非

後儒曰。觀子指陳諸教異同。俱見根柢。請迪我聰明。相與精察諸教之是非。一洗從前之陋解。益我心性。不良多乎。

先儒曰。夫所謂教者。必推原天地間有一上主執賞罰之權。判定善惡。絲毫不爽。方足稱之爲教也。乃異端紛然。居心悖違。凡有議論。皆欲非詆上主耳。釋教信輪廻。所論賞罰。狎侮鄙陋。供人笑談。如此者。詆上主之至公。道教信邪神。云六合之內。

神祇彌滿。分掌天地萬物。如此者。誠上主之全能。競談理氣者。謂理氣與上主渾爲一體。無所區別。如此者。誠上主至尊無對之神體。且云宇內禍患。皆惡人之怨氣所感。宇內福祥。皆善人之和氣所召。如此者。竟將掌握乾坤。宰制羣生之上主。一筆抹煞矣。以上皆謬說。蓋謂天下萬事萬物。俱屬已定。並無上主宰制。不過如自鳴鐘之輪轉相同耳。故云天有一定之氣運。吉日凶時。必待星家推算。地有一定之土脉。主祥主災。必須堪士詳觀。殊不知天下之事。有與一定之氣數。迥不相關者。厥有兩端。一則事由人定。殫其聰明。成敗利鈍。先已預料。此與風水美惡。時日好歹。固無干涉。一則事由上主所定。其命已定。神聖莫測。術士何人。安能改上主一定之成命乎。要之此時作善。則此時卽爲吉時。此時作惡。則此時卽爲凶時。何庸枉費心思。妄加推算爲。總因立教無本。任諸家騰躍。千百其門。微獨不可爲。

教。且係上主之仇敵。人心之蠹賊也。○獲罪君上。必加重刑。詆毀上主之異端。竟容其搖唇鼓舌。縱橫其說。以亂天下。如之何其可耶。今觀妖人術士。挾風水占卜。陰陽術數虛妄等事。蠱惑人心者。徧察天下各方。在在皆是。吾恐世人容之。上主威靈。必降嚴罰也。○上主肇造吾人。令人欽崇者理也。而異端之人。竟將邪神誤認爲上主。且隨自己之意。立邪神爲上主。敬求邪神。妄想聰明富貴等。其乖謬悖亂。何至此極乎。國語云。古者民神不雜。及少昊之御宇也。九黎亂德。民神雜揉。至顓頊而百度維新。治歸上理。乃自漢代以來。卽如少昊之世。民神雜揉。不辨邪正。竟將神與人。人與物。上主與邪神。天地萬物。太極陰陽。同屬一體。混然不分矣。聞之二千年前外國之書。極贊中國上古之時。風俗醇美。人心專一。無淫祠。無塑像。敬上主之眞實。除邪神之僞妄。至於今而此風邈矣。不可復覩矣。可勝悲哉。○徧

考五經。並無封神之說。今禮記雖有其說。乃係暴秦之時。呂不韋附會之辭。非古禮記原有之本意也。安可一誤而再誤哉。○今觀天位乎上。地位乎下。萬物錯陳。其光華燦麗。美好精工。無非羣微上主之福德美善。至極無加。使人仰觀俯察。竦然時存敬畏。肫然時深感謝耳。無如異學居心暗昧。罔識真元。日月揚光。甘霖普被。誠上主命天以普其惠。乃稽頰叩首。謝蒼天之惠我靡盡。百果茂盛。五穀豐登。實上主命地以著其德。乃跪拜趨躡。感厚土之德我良深。此如雙親慈愛其子。置造房屋樓臺。令之安居樂業。而其子竟不追念父母之慈愛。惟叩拜房屋。能蔽風雨。防寒暑。如之何其可耶。夫不報雙親之恩。而歸功於頑然之房屋。不感上主之德。而歸功於塊然之天地。如此行爲。豈不令人甚可笑訝乎。房屋堅固完美。必贊匠人之工巧。更感祖父之遺恩。今上主乃人類大父。造生天地。如萬民一大公室。

也。其間美妙不可言傳。人類居其中。左宜而右有。取之無窮。用之不竭。其生養栽
培之恩。誠無窮極矣。乃喪厥本原。迷失真宗。戴天履地。而不知天地之真主。加敬
加愛。惟向著天厚土。感恩而報德。抑何弗思之甚耶。○稱之曰神。則神明莫測。能
有主張。作此作彼。罔弗任意。至於形天。運動有常。如火就燥。水流濕。皆其本性一
定。不得不然者。今觀火就燥。水流濕。數千年以前如此。數千年以後亦如此。天之
運行。數千年以前如此。數千年以後亦如此。均未見其有異也。倘謂天運由已。變
動無常。天文家何以推時定準。千百年來毫無差忒。孟子何以云天之高。星辰之
遠。苟求其故。千歲之日至。可坐而致乎。若然。則天不過塊然一巨物耳。微獨不可
謂神。亦無靈性較貴於人矣。至於地。乃汚穢之所歸注。人物之所踐踏。較人更爲
卑賤。今以具靈神。通物理。靈超萬類之人。俯首而拜塊然之天。污穢之地。望其降

福禳災可恥孰甚乎。詳考古經並無拜蒼天厚土之說。人之當天而祈拜者。即如臣民向金闕而叩首。非拜金闕也。正所以拜皇上耳。以是知古先明王。向天而行郊祀之禮。非郊祀蒼天也。實郊祀天上之上主耳。○試觀麗於天體之物。無有光華愈於太陽者。然太陽具熱光。普照寰區。不過一巨火耳。至於太陰五星。本體原無光亮。與地一類。俱無靈明。能降禍福。使人知所敬畏。不敢慢加指摘也。人心有靈。知其爲頑物。故詩小雅戲之曰。維天有漢。監亦有光。跂彼織女。終日七襄。雖則七襄。不成報章。又云。維南有箕。不可以簸揚。維北有斗。不可以挹酒漿。假使天有靈。星宿等亦有靈。孰敢仰天而嘲笑若此乎。○自古先王。尊敬上主。禮義明備。今以此禮敬奉邪神。而不欽承上主。若然。則是人廢棄上主。卽廢棄自己矣。故不畏上主之賞罰。而行險微幸。縱慾偷安。驕奢淫逸。無所不爲。人其面。獸其心。且物類

所不爲者而人爲之。何怪上主棄置吾人於萬物之下。許其拜蛟龍龜蛇驢馬等畜乎。○人不能隨意立一人以爲君。而拜稽恐後。亦何能隨便立一人爲上主。敬拜弗遑乎。○棄自己之君上。立一賊而反顏事之。君前大逆不道。莫此爲甚。絕上主而敬拜佛老等僞神。上主前罪惡深重。豈可以言語形容乎。○無論何種異端。俱心志迷惑。莫識真宗。不向上主而向邪神。岐路傍徨。竟不知生前死後之真賞真罰。究在何處。其關人性靈之升沉。豈淺鮮哉。夫異學莫識真宗者。總因未明真教之正理耳。苟明乎真教正理。則是非昭然。邪正判然。而諸種異學。可不辨而自然息止矣。

後儒曰。聞子所論真教之正。愈知邪教之非。爲害最劇。深願早聞真教。豁予心蒙。今邪教之非雖明。但何教爲真教。尙未透達其精義。幸賴高明。歷歷指陳。我心歡樂。

當何如耶。

先儒曰。天下之事。最關緊要者。莫真教若也。天地真主。賴真教以明之。吾人靈性。須真教以闡之。且人生前死後之究竟。更藉真教以解之。倘稍有錯誤。微特以上諸大道。俱昧昧以終身。且形軀一死。身後之懊悔。永永無窮矣。今佛老等僞教。其爲害真教者。猶淺。前已畧陳梗概。無煩多贅。惟性理一書。流傳人世。人人奉爲規程。漢代諸儒開其源。唐宋諸儒逐其流。談天道。論人性。自謂上古經書之正傳。不知古經因此而愈晦。古教因此而愈亡。爲害真教。更非他教可比。蓋此書持論玄微。摭拾古經之末談。隱逆真教之實理。差之毫釐。謬以千里。予以前所論諸端正理。惟闡其大畧耳。今爲子直揭其隱病。痛下一針可也。

第十一篇駁漢唐以來性理諸謬說

信宇宙定有上主。其體純神。並非理氣。此真教之大本也。但漢代以來。有一般談性理者。其稱上主論人靈性。竟謂上主及天地人物。同屬一理。並無分別。且將天理卽認為上主。其語含糊不得明透。不知天理者。卽天之形體。本係圓形。日月星辰。麗於其上。運動有常。千古以來。毫無差忒。不過爲人仰觀俯察。推時定準。供役吾人。便人日用之需耳。又安可妄以天之理。卽爲天上之主乎。倘不分別天地之上。有一自有純神之上主。謬指上主。卽是天理。此不惟不識上主。且獲罪上主。無窮矣。至於人心所具之天理。卽是人心本有之良。係上主原化性命之德。爲人心之準則。分是非。定善惡。不容或昧者。今將上主及人心之本良。全無分別。統謂之爲天理。妄論失實。微獨滅上主之實義。且大逆上主造物定名之本義矣。○上主乃造化天地之大主。宰制人物之元君。而性理諸書。乃云上主非他。卽理也。理卽

性也。性卽命也。渾然同此物事而無所分別也。以此立論。是將上主與天地神人萬物同謂之性理與命矣。然古經但言文王小心翼翼昭事上帝。未言昭事性理命也。言上帝臨汝。無貳爾心。未言性理命臨汝。無貳爾心也。性命類間之者曰大哉乾元。萬物資始。乾道變化。各正性命。萬物盈於兩間。生生不窮。日往則月來。寒往則暑來。風雷之所以鼓動。山水之所以流峙。皆蒼蒼者實有以主其權耶。抑只是太極爲萬化之樞紐。故能如此。問之者甚爲切實。而答之者當云蒼蒼者乃塊然之物。固不能主其權。而太極係頑然之氣。亦不能爲萬化之本。其中定有一至靈明。至赫濯。全能極智之上。主其權而總其造化之機也。以此答之。方能使問之者得有明示。庶不愧名儒之稱。乃偏答以含糊之語曰。此與前只是一意。而理性命之外。並無他說。是問之者冥然而答者昭然。均不識天地開定有上主也。皇

極經世書云。神則明矣。潛天潛地。不行而至。不急而速。不爲陰陽所攝者神也。通書云。神妙萬物。又云神則不離於形。不囿於形。如此論神。則此神非他。卽我古經所稱天之主宰。古先王郊祀之上主也。按此則以上所稱之神。甚合正理。其後又復生他議。乃曰性則神。又曰神者人之主。將寐在脾。熟寐在腎。將寤在肝。正寤在心。又曰神是天地之心。以此講神。則又與我古儒小心翼翼。昭事之上主大相矛盾。滅其實義矣。夫旣云神不離形。不囿於形。正脗合詩經所云。上帝臨汝。無貳爾心之義。乃復云。神忽在脾。忽在腎等。如此論神。則是心無定見。先後不相符矣。易學啟蒙云。上帝出乎震。齊乎巽。相見乎離。致役乎坤。說言乎兌。戰乎乾。勞乎坎。成言乎艮。不知易惟云帝出乎震。蓋震者東方也。東方爲陽明首區。言上主超出八方之外。高出乾坤之上。而造化之功於此立基焉。不過借來之辭。後儒乃贅許多

無理之談。是誠何心。倘如此講上主。竟將全能上主。講成一人。勢單力弱。自此詣彼。會此則和。遇彼則乖。幾經奮勇。幾經苦戰。危然後安。困然後舒。銳意爭先。盡力攻殺。方能治定功成。安然主宰於天地之上矣。不然。則竟無以爲上主也。夫上主乃我古儒極口贊其美好無窮。能智無加。小心翼翼。昭事弗違者。而如此輕慢。如此狎侮。如之何其可耶。苟有人於此。侮蔑其君。國法王章。必不寬貸。今將至尊無對之上主。如此貶損。悖逆之罪。安能逃上主之監觀乎。有心真教者。辨而闢之可也。○詳閱性理諸書。敬上主之言不多見。而勉人修德。惟云天理所當然。良心所固有。竟不知上主爲萬理之本。賦性之原。修德之根。舍上主而但云修德係天理所當然。良心所固有。是更將古經所稱降衷之上主。賦性之上主。人人所當昭事。感謝之上主。不過講成一良心天理之虛文套語了事而已。如此則雖極力勉人

修德皆係無根之浮語。豈有探本窮源之實義乎哉。○程子云。夫天一而已。以形體言之謂之天。以主宰言之謂之帝。以性情言之謂之乾。以此而論。是上主亦有形矣。既有形像。則上主係有形生活之物。需飲食以養之矣。試問上主需飲食。何物以養之乎。○後儒著性理之書。其中講解理性命三字。講解天地萬物之理。持論甚爲含糊。不合正理。竟將上主之性。謂爲太虛之道。將上主生天地萬物之理。謂爲陰陽浮沉。勝負屈伸。自然流行太和之氣。不特愚己。且愚天下。大滅上主之木義。詳閱古往經書。論上主之性。本有精義。明其精義。乃可著之辭說。不然當如孔子述而不作。信而好古可也。安可妄加註釋。以亂真傳乎。○性理書有云。譬如言光。必有鏡。然後有光。必有水。然後有光。光便是性。鏡水便是氣質。若無鏡水。則光便散矣。按此則人之靈性便如光。人之形氣便如鏡與水。人之形死。則靈性亦

死矣。又云。如五色頓在黑多處。便都黑了。入在紅多處。便都紅了。却看稟的氣如何。然此理只是善。既是理。如何得惡。所謂惡却是氣也。按此則人之善。因人之性。即是理也。理即是善。人之惡却是人之氣也。如此則凡人之理不能不爲善。人之氣不能不爲惡矣。夫爲惡之氣。既不由我。爲善之理。卽人性也。亦不由我也。若然。則所稱人心有靈。主張由心。權衡任意。何在乎。夫所謂賞者。賞其苦身克己。勉力爲善之苦心耳。所謂罰者。罰其縱慾偷安。放恣爲惡之逸志耳。今爲善爲惡。旣云自然而然。毫不由己。而善者福之。淫者禍之。何以服人心。而稱賞罰之公當乎哉。曠觀今古。賢愚雜處。善人而忽變爲惡。惡人而忽變爲善者。不知凡幾。人試撫躬自問。未有不自覺其心有自主者。微獨作善作惡。莫不由己。且方爲善。旋復爲惡。亦莫不由己也。今按性理書又云。我作善非由氣。作惡非由理。作善由理而作惡。

由氣也。以此而論。是作善作惡。非惟一所以然。乃有理與氣兩所以然矣。然我返心自審。而作善作惡。獨我一心爲主。確有明證。今我既惟一。足徵人之性。其作善作惡。尚有他主。不止理與氣而已也。他主者何。我也。我循理而逆氣。循氣而逆理。非止理與氣爲之。乃我之大體。我之靈性。主張於其間。而不使理與氣得以混淆也。

後儒曰。雖然。畢竟人之私欲。人之惡氣。究自何來。人之私欲。錮我聰明。究係何故。願明教我。

先儒曰。遯夫開闢之始。造物主特造男女二人。爲我人類元祖。此二人者。並非所謂乾道成男。坤道成女。由陰陽二氣妙合而凝者。亦非由父母生育而有。然係上主全能特造之而有。此二人既係上主特造。非由人道而生。其性情本來平和。原無

私欲之累。迨後人心頽敗。私欲叢集。皆緣吾人自取之也。上主立此真教。非特示我蒸民。知私欲之由來。且係治神病之良方。按其得病之由。施以應症之神藥。因人順自己之私意。則爲惡。逆自己之私意。則爲善也。○程子論人之所以成聖有二。一爲性之者。一爲學之者。性之者如堯舜孔子是也。學之者如成湯武王是也。不知人之所以爲聖。俱學之者。孔子曰。我非生而知之者。好古敏以求之者也。倘此言稍有不實。是孔子自欺以欺人也。吾知其決不如此。孔子所謂生而知之者。是謂此人聰明高出乎凡衆。並非謂克己修德。不甚吃緊用力耳。豈謂生來即是聖人乎。當以其辭逆其志可也。不然則堯典虞書所云。人心惟危。道心惟微。惟精惟一。允執厥中。十六字之真傳。皆爲虛語矣。須知人之生也。無論聖愚。人心皆危。道心皆微。詳察古經。堯舜禹湯相與授受之際。俱諄切告語。命之惟精惟一。允執

厥中。未聞生而卽聖。不必勉力爲學者也。○皇極經世書曰。人之神。卽天地之神。人之自欺。所以欺天地。可不慎哉。此言大悖古經正理。何以知其然。曰商頌曰。聖敬日躋。昭假遲遲。上帝是祇。湯誓曰。夏氏有罪。子畏上帝。不敢不正。是古先明王。深知宇內有上主。故不顯亦臨。無斁亦保。幽獨間不敢稍蒙欺詐之念。以獲罪此上主也。然則古儒篤信上主。是人神之大原。豈信人之神卽天地之神乎。○性理書云。人於獨知之地。所作不善。他人雖不能知。然瞞得人。瞞不得理。不知理也者。不過上主所賦人性中之規矩法度。命人遵守者。屬依賴之品。乃無爲之道。有何靈明昭察。令惡人有所嚴憚畏懼。不敢爲惡乎。吾觀古儒警惕惡人。謂小人奸險。居心狡詐。雖能欺世人之耳目。究莫能逃上主之明威。蓋上主雖云無聲無臭。無形無像。而全神昭著。無所不在。古儒深明此理。故著書垂訓。令人戒懼慎獨。不容

稍懈。中庸所謂莫見乎隱。莫顯乎微者此也。上下數千百年。道統之真傳在此。從此探本尋源。而上主可明。靈性亦可以識矣。無如近儒議論失真。舍上主。昧靈性。執定理爲主宰之說。蠱惑人心。貽害萬世。何怪乎人心私慾日熾。千載而下。不得真正爲善之門路乎。○性理書專言理氣。與古經必不相符。又不敢蔑視古經。往往勉強支吾。逃遁其說。以合古經。究與自己之本意。大相逕庭。及讀書經。明言商王高宗。恭默思道。夜夢上帝。賚以良弼。又不能不信此言爲真實也。既不能逃遁其說。不得已而降心相從曰。高宗夜夢之上帝。或卽是古經所稱之維皇上主。洵不得以理氣混之也。嗚乎。倘非書經云。高宗夜夢上帝賚以良弼一事證之。予竟無奈此後儒何也。

第十二篇論今之明儒識見雖高。議論雖正。但於真教至理。尚有不足處。

後儒曰。性理一書。雖原於漢儒。集於宋代。其間淹貫五經正義。而深契古儒真解之士。多不服此書而心非之者。代不乏人。是真教不絕。尙存一縷者。猶賴此等名人傑士相與維持也。王陽明文集云。朱子晚年。固已大悟舊說之非。痛悔極矣。至以爲自誑誑人之罪。不可勝贖。世之所傳集註或問之類。乃其中年未定之說。自咎以爲舊本之誤。思改正而未及。而其諸語類之屬。又其門人挾勝心。附己見。固於朱子平日之說。尤有大相刺謬者。按此則朱子已亡。而陽明不服。致有後論者。因其註釋經書。多有晦暗。未合古經之原旨也。又王安石居心執拗。云天下萬事皆係氣數一定。並無主宰權衡其間。而富弼司馬光等。深明古儒真傳。心皆不服。由此觀之。則累朝哲士。衛正道而歸古儒之真傳者多矣。苟信從此等明儒正論。則遵聞行知。將見上古真教可復。天地真主可明。何必更須子所稱真教乎哉。

先儒曰。前代明儒。雖識見高超。議論確實。能於異說雜興之後。力砥狂瀾。固可遵守。然不及上古真儒。於旁門未起之先。獨垂真訓。更足信從也。蓋孔子沒。而古教失傳。處士橫議。雖以孟子之賢。正人心。息邪說。以言拒之。尚難挽回。况其他乎。鄭樵云。昔者七十二子在孔門。問道均矣。夫子沒而其說不同。况復傳羣弟子之門人。則其失又遠也。從而信之。則矛盾可疑。歐陽修云。聖人沒。六經多失其傳。一經之學。分爲數家。不勝其異說也。孔子沒。周益衰亂。先王之道不明。人人異學。肆其怪奇。後之學者不能卓然誅絕之。牛弘請開獻書之路表曰。昔周德既衰。舊經棄乘。孝經正義序曰。夫子沒而微言絕。韓愈與孟尚書書曰。及秦滅漢興。古書皆殘缺。十亡二三。請開獻書之路。表又曰。及秦漢馭宇。先王墳籍。掃地皆盡。此乃書之一厄也。漢興詔劉向父子。籌校篇籍。漢之典文。於斯爲盛。及王莽之末。並從焚燬。此

則書之二厄也。光武嗣興，尤重經誥。孝獻移都，吏人擾亂，圖畫縑帛，皆取爲帷囊。所收而西，七十餘乘。西京大亂，一時燔蕩。此則書之三厄也。魏文代漢，更集經典。晉人承之，文集又廣。爲劉淵石勒馮陵，從而失墜。此則書之四厄也。論刪去九經正義中譏緯劄子云：自暴秦焚書，漢興收拾亡逸，所存無幾。或殘編斷簡，出於屋壁，而餘齒昏眊，得其口傳。伏生年九十餘，老不能正言，言不可曉。使其女傳言，教量錯。齊人語以穎川異錯，與不知者十二三。去聖愈遠，莫可考證。按以上諸議論，漢得古經緒餘，皆荒唐無據。雖有一二古儒真訓，僅收什一於千百，不足取以爲徵。且難以諸儒臆說而附會牽扯，說法竟不相同。由此而論，則古書既失其全籍。但憑一二古經遺義，安足證全備無缺之真教乎哉。○世之明儒，雖知宇內有上主，但於上古恭敬上主之典禮，已失傳矣。蓋人有神形兩者，皆上主所造。兩者胥

盡於上主之前。始於上主之前無愧耳。於是知吾人欽崇上主。內外兼全。情文兩備。而真教之禮始盡。上主之尊始顯也。今儒論不及此。奈之何哉。但人各有良。不能離教。倘無真教講明恭敬上主內外之禮。則人必無真向。既無真向。又何怪認賊爲主。認偷盜而爲父母。拜敬邪神。日陷於淫祀之非乎。○古儒所著禮記。今失其傳矣。蓋古儒著古禮記一書。必編定年月日時。自天子以至於庶人。其所以敬事上主之禮。定燦然各備。無少欠缺。易復卦云。先王至日閉關。自今論之。斯日也。無論后王君公。以至億兆羣黎。俱有敬事上主之禮也。詳閱今日之禮記。竟不其然。惟備載君臣父子夫婦昆弟賓客等相接之禮。及養生送死之禮。而郊祀大禮。惟天子得以行之。諸侯且不敢干。况小民乎。揆厥由來。時至戰國。國家亂亡相繼。民不聊生。喪失本原。而敬事上主之真禮。無暇修明耳。迨後書經秦火。人離上古。

愈遠。而愈失其真矣。可慨也夫。○今異端橫行。邪神倡亂。後儒恐其亂靡底止。執定理氣以爲造化之根源。自謂談空說無之異端。可以息止矣。不知理也者。乃依賴之品。非自立之體。所謂規矩法度者是也。至於氣。更屬頑然。並無知覺。試問有何靈明。有何自主。而能肇造乾坤人物。主人生死。賞罰善惡。毫髮不爽耶。揆之古經。惟上帝不常。作善降之百祥。作不善降之百殃。之正道實學。洵不啻天淵之別矣。是欲護古經。而反悖古經。何以正人心。息邪說。而復堯舜禹湯文武周孔之古道乎哉。獨維皇上主所立之教爲眞教。無纖毫差謬。其餘雖德如聖人。亦有所不知不能焉。蓋聖人卽德邁人羣。究係人類耳。聰明有限。才力有缺。決不能定人心之真向。統普海內外。古今萬世之人心。胥納於上主惟一之眞教也。○今儒惟值禍患臨身。始籲求上主以禳之。而於修德克懲。從未聞籲求上主降寵佑。奮力前

修者。倘修德克慾。自恃己力。必傲然自是。名曰修德。實悖眞德。名曰克慾。實順己私。心性昏冥。與上主之心性。定相悖謬矣。則德何以積。慾何以消乎。○譬一居心端正之善人。無端而橫逆相加。仇人設法誣陷於君前。百端妄證。間成大辟。遭凌遲重刑。危苦莫當。是必上主所立眞教方能安慰其苦心。若但據今儒所論生死浮言。何足使斯人甘心受死。泰然自安。而無憂懼乎。○忠孝之本。根於敬愛上主。緣上主乃宇內大君。萬民共父。且係賦性之大元也。推敬愛上主之心。而忠君孝親。則爲臣止敬。爲子止孝。彝倫克叙。萬理歸宗。今儒論忠孝之道。第云理所當然。性所固然。或且推原於太虛太和之理氣。而不推原於至義至公之上主。議論無本。雖云盡忠盡孝。乃係舍本求末。何有忠孝之實義乎。○今儒於上古經書。亦嘗殫盡心思。逐章逐句。爲之詳加註釋矣。然原本殘缺。而註解益混。好古深思之士。

細玩古經餘緒。未嘗不歎惜痛恨今儒之註釋。大非古經原旨也。嗚呼。上主不明。古經晦暗。何怪佛老橫行。陰陽風水命相占卜之異端。倡亂我中土乎。○今之自命爲儒者。未嘗不云繼往古。開來學。但抱恨禮樂文章天文等之失傳耳。然宇內真教。豈不較禮樂文章天文等更爲吃緊乎。舍本逐末。專事禮樂文章天文等雜技。縱使禮樂明備。文章天文精微。於吾人心性實學。究何裨耶。○今儒講作善之道。固有確論。然迪人爲善。禁人爲惡之道。概皆缺畧。未能詳備。故論人世當盡之理。雖覺明切。而行善畢竟何爲。尙歎然未見分曉也。○今儒論太極陰陽。理氣心性。人之形軀等。皆未見大原。不過含糊了事。實屬無用之浮談耳。至於五經所論。上主至義可畏。至仁可愛。人之靈性。貴超萬彙。獨係上主降衷之恒性。有始無終。生前善惡。死後賞罰。若毫髮不爽之大道真傳。俱無確當了徹完全之義。豈不使

作惡之人。肆無忌憚。泰然自安乎。○今儒論作善之道。較釋老二教。高矣遠矣。釋老作善歸本於空無。儒教作善。先須誠意正心。而後發爲實行。其論固爲精切。然作善無真向。則所作之善。虛而無據。何也。蓋上主爲蒸民大父。當思報其恩也。上主爲宰制乾坤人物真元。當思仰其威也。且上主爲萬福之原。萬善之本。當歸其宗。而愛其美好無極也。儒家所著勸善之書。不過云全其性分所固有。喜其心性之無虧。甚且爲功名揚於人世。富貴綿於子孫。有家國天下之責者。第云修身特爲齊家。齊家特爲治國。治國特爲平天下。數者之外。更無他向矣。夫宇內真教。包含靡遺。豈可云完此數端。卽足盡真教之大全乎。詳玩古經。作善降百祥。作不善降百殃之旨。明明兼生前死後立論。而今儒但言生前。不論死後。如此立說。不過養人私欲。喪人實德。何能超乎私欲之上。另有所謂真福真禍之正解耶。○論斷

古經書。漢唐宋明諸儒。見解各別。多有異同。故生當今世。惟信經不信傳可也。但古經雖云可信。而秦火而後。多晦暗不明。亦不足取徵真教之大全也。○今儒未嘗不對應古儒之言。但於古經不加深玩。究不知其意旨之所歸。亦嘗口贊古經。而心實不明。是故起視斯世。風俗之澆漓。不及上古風俗之醇正遠矣。兼之異端雜出。遍滿寰區。倘今儒非口是心非。何至安臥枕席。不思急爲拯救。求臻上古老成切實。道一風同之古教乎。○今古經既已失傳。則真教無窮妙理。其詳不可得聞矣。倘無真教補其缺畧。何以復明古經之真解乎。○漢唐距秦未遠。古經失傳。即在目前。彼時儒者。居今稽古。尋墜緒之茫茫。抱殘編而流涕。蓋深知古儒衰亡。而真教不可復振也。至宋而英才並起。聰明蓋世。宜探本窮源。追遡古經實義。按次補綴。註解分明。使萬世而下。因古經而認真教。將見古經之昭著。如日月之經。

天。豈不盛哉。豈不快哉。乃迷失古儒真教。妄加註釋。病根愈深。愈難救療。且師心
自用。自謂道義甚高。文章極古。目空前古。藐小後今。徵特諱疾忌醫。且有病不認
病。雖有良方。何由治其痼疾乎。○當知人欲詳察真教之理。譬之修室。培根基。砌
墻垣。豎棟樑。椽柱。漸次修造。始能成高樓大厦之觀。吾先論人之靈性。是神非氣。
後論宇內有上主。尊高無上。能智無窮。一切乾坤人物。盡係此主造成。並非後儒
所稱太極陰陽理氣。天地鬼神之謂。實爲太極陰陽理氣。天地鬼神所從出。子苟
明上主謂何。自明吾人靈性謂何矣。至論宇內當有真教。非人所立。定係上主所
立。明指世人當孰何法以辨真僞。俱有至論。不容稍混。且援引古經。證明真教。更
有確據。並非臆說。雖聖人復起。不易吾言矣。凡此論辨。非吾一人之私見。實合之
萬國經史。千古聖賢。然後敢以得之一心者。質之萬世。倘吾言未盡。子自聰慧。必

能聞少知多。漸悟大原也。但最關緊要者。惟在分別立教之真僞。以定從違。若真
僞莫辨。卽殫盡心思。究何裨乎。



性理真詮提綱四卷續

遠西耶穌會士孫 瑋德昭氏述

靈性之道目錄

第一篇天主教實義

第二篇古儒真教卽天主教

第三篇天主教實義畧舉數端



文獻卷之三

卷之三



性理真詮提綱四卷續

遠西耶蘇會士孫 章德昭氏述

靈性之道

第一篇天主教實義

後儒曰。聞有一教。係泰西諸士自有明萬歷年間。航海東來。數傳中土。名曰天主教。諸士遵奉此教。徧敷寰區。以此教爲真教。予也賦性愚昧。不能輒見大原。仰惟吾子教思無窮。俯憐愚衷。願啟我夙蒙可也。

先儒曰。天主教係上主於開闢之初特立者。有原有委。有根有據。旣遵從之非易。覺悖逆之實難。故與其悖此教。莫若舍此生。當此教初傳之時。三百年間。舍身致命之聖賢。不下千萬餘人。蓋深明此教真實。具欽崇上主之鉅典。內外之禮。無不兼

該且具賞罰之公義。生前奉事天主。死後報以真福。悠久無疆。所以審膺刀鋸烹于鼎鑊。弗敢背棄真主也。按天主立此教於世。從生民以來。保全至今。西士遵奉此教。敷傳中土。亦傳各國。蓋西士之足跡。幾遍萬國矣。

第二篇 古儒真教卽天主教

後儒曰。人從真教。則逆私欲而順公理。從僞教。則順私欲而逆公理。人心多私。與其逆私欲而苦身克己。孰若逆公理而縱欲偷安。緣是左道蠭起。而古儒真學。因此日亡。唐宋而降。諸儒閑先聖之道。息邪說。跋詖行。其立意未爲不美。然專尚理氣。不認具理之大原。造氣之真主。各自爲說。妄加註釋。是欲蓋彌彰。求伸反屈。何以醒世迷復。古教哉。今子謂真教卽係古教。此論無可置辯。但謂天主教卽係古教。此言吾不能無疑。子當明白曉喻。釋予心蒙也。

先儒曰。細按我中國古經之緒餘。與天主教經典之大全。兩相對勘。確知天主教的
係古儒真教。無纖毫可疑矣。中國有詩書易禮記春秋五經。天主教亦有經書。但
天主教之經書。未經秦火。詳備無缺。中國之經書。既經秦火。殘廢無序。中國經書。
但云洪水滔天。懷山襄陵。不云洪水之降。畢竟爲何。且不書其年月降於何時。天
主教之經書。不特書天主降洪水之故。且書洪水降於何時。息於何日。中國經書。
但云乾三連。坤六段。天地之定體。又云天尊地卑。乾坤定矣。而肇造天地。畢竟爲
誰。未見發明天主教之經書。微特確記天主生人實義。且詳記天地肇造於天主。
確有次序。非偶然而有。天主首造天地。次造日月星辰。又次造禽獸。最後方造人
類。蓋天主愛人至極。造此天地萬物。俱爲服事吾人。使之識認天主。感恩報德也。
中國書。但云至日閉關。天子當率群公百僚。郊祀上主於圜邱。並未詳言郊祀之

實義。天主教之經書。備述郊祀實義。天主係肇造乾坤。宰制群生。恩無窮。義靡盡。之真宰。無論尊卑上下。聰明愚賤之人。俱宜存心養性以事之。稽類叩首以拜之。中國經書。但渾言神之格思。不可度思。矧可射思。并未明指神屬天主特造。正神邪神之分別。天主教之經書。所稱之神。係上主從無而造。且分別正神邪神之來歷。甚爲詳明。中國春秋一書。勸善懲惡之書也。以褒貶寓賞罰。彰善而瘅惡。法良而意美。故曰孔子成春秋。而亂臣賊子懼。然但言生前善惡之暫報。未聞死後賞罰之分明。天主教經書確指人之靈性。永存不滅。善人惡人。雖暫報於生前。尤永報於死後。講得十分透切。無半點含糊。中國經書。所論一切敬奉上主之禮節。畧而不全天主教經書。所論一切敬奉天主之典禮。詳而且備。○今予將中國五經。與天主教古經。細加合對。詳畧昭然。予旣聞之。足徵予之遵奉天主教。恪守此教。

規誠非屬不經。允係古儒相傳上主特立之真教也。明大學士徐光啟奉天主教而後客有問之者曰。先生乃中國名儒。位冠百僚。何故棄儒教而信從外國人所傳之天主教乎。先生答之曰。予之信從天主教。非棄儒教也。乃闢佛教之謬說。補儒教之不足耳。蓋中國古經失傳。註解多舛。予夙昔爲其所誣久矣。今幸已聞天主真教實理。方大悟從前之非。自喜予之間所未聞也。予不聞學類有云。古之人得其師傳。故因經以明道。後世失其師傳。故非明道不能以知經。予之遵奉天主教也。正明道以知經耳。子何異乎。夫天主教既能補儒教之不足。乃係儒教之真傳。詎得云天主教傳自異方之人。遂謂其不經乎。天主教敷傳我中夏也。已歷有年所。聿考前代。憑據多端。陝西省有景教流行中國碑文。其中備述天主教道理。至詳且備。江西福建等省所留天主教古跡。筆難罄述。人雖莫知其故。而天主教

之人能深悉其由來。道其詳細也。大聖梅瑟距開闢未遠。與上古聖賢口授心傳之道。雖係聞而知之。然不啻見而知之者。故具論生人奉祭天主內外之實理。正神邪神之分別。人性大體小體之尊卑。及人性何以類敗。世苦何以叢生。論有根柢。言無虛僞。著爲經典。以教萬世。此乃天主教經之總匯。亦書教之結穴也。天主全智。知相傳已久。必致迷失真宗。棄上主而拜邪神。故預擇一國。名曰如德亞。降多恩寵。篤生多聖。遵奉此經。罔敢或墜。天下有五大名洲。此國與中國同隸於亞西亞洲之地。非西洋。亦非中國。介居西洋中國之間。當千餘年之前。大西諸國。邪教紛紜。人心淆亂。不認天主。後有天主教諸士。從如德亞航海梯山。舍身致命。幾經艱難。幾經困苦。至泰西諸國。以真教之理。多方勸化。然後天主教始開。撥亂反治。至今天主教是遵矣。但考其初。如德亞國之人。深感上主鍾愛隆恩。通國之人。

甚加欽崇。迨後此國之人。大負主恩。居心虛僞。外君子而內小人。敬禮邪神。輕忽
真主。緣是上主特降嚴罰。令其悔悟前非。痛加懲改。暫令敵人統兵。侵佔其國。擄
其人。爲僕爲奴。亦有抱古經逃竄天下各方者。我中國史書所稱大秦國。此國亦
居其中也。○我中國堯舜以前。事跡荒渺。微特中國如此。天下萬國莫不皆然。故
孔子刪書。斷自唐虞。一切荒謬不經之言談。悉削不道。當其時萬國盡失其傳。惟
天主教古經。自古有如德亞人。心志堅固。捍衛此經。纖毫莫失。此經歷序從開闢
以來至梅瑟。人類在世。共有幾何代。世事變易。人性壞。世道乖。究竟何因。言之鑿
鑿。實有根據。按此則天主教允爲上古相傳之古教明矣。我中國好古深思之士。
宜篤愛天主教。實爲自古相傳之古教。方爲切實。豈得以傳自異方。遂即藐視哉。
且各種邪教。始自何代。倡於何時。皆可考而知。惟天主教起自何世。奉自何年。俱

不得詳察而知。由此觀之。則天主教洵爲中國古教。決非近代所傳之新教明矣。

第三篇天主教實義畧舉數端

天主教道理。有昭然易明者。有淵然難喻者。其難喻者。決非人之明悟所能詳察。此無足深怪。因吾人本性。原自尊貴。恐其驕傲自是。蕩滅本良。是以特立至善之規。遏其私欲。不容橫流。故令人愛仇。不令人復仇。教人娶妻。當循正道。一夫止配一婦。納妾姦淫。概不許行。且不止斷絕其淫行。尤禁其淫念之偶萌。一切邪色邪聲。不許觀聽。非理之財。必償本主。夙愆雖蒙赦宥。尚須痛悔補贖。改易前非。以修實德。種種良法美意。不啻神病之妙藥靈方也。但此真教尊高無下。至公無比。旣不肯稍貶其道。以從人意。宜其所如不合。不獲通行於世矣。然而廣衍萬國。上而君公。下而臣庶。智而博學鴻儒。愚而庸夫俗子。咸奉此教。篤信無疑。則天主教爲

宇內公教。其確據更昭然矣。且愚賤之人。聰明有限。但憑耳目以爲準則。今天主教之理。精微莫測。似非愚夫愚婦與知與能者。然而一經講明。無論愚夫愚婦。一若相安于無事。不啻本性之固有。卽宿學明理之士。雖未明其義。莫肯輕信其事。然殫精竭慮。竟致徒勞。究不能不深服其道理精微。出人之思議。故不能不降心相從也。且人世所最重者。安富尊榮耳。而聖教皆不屑焉。謂其得之不足爲榮矣。之不足爲辱。與人情相反。而人皆篤信罔疑。故其安富尊榮之人。一自奉教欽崇之後。寧乘萬乘之尊。舍王侯之貴。爲道致命。以證公教之眞實者多矣。按天主教古經預言。聖人生于何時。實係何地。又詳紀此聖人。與其門徒以天主教提醒本國。後弘布於各方。始終本末。莫不備錄無遺。此聖人稱名耶穌。自東漢光武建武六年。始週行如德亞國。傳教化人。此國在西洋迤東。中國迤西。適介乎中國西洋。

之間。此國自古以來。將天主教古經。兢兢奉守。毫不敢忽。因此經係上古群聖所著。其中確指此大聖人在世所歷事情。所立德行。所著異跡。所顯威嚴。與他聖人迥乎不侔。如命啞者言。聾者聽。跛者走。癱者行。死者復活。巨浪雄風。命息卽息。天地百神。咸聽其命。不可枚舉。又古經多有晦明。此大聖人。乃明白解釋。不急而速。不謀而孚。人人莫不服從。洵非天主之全能。不能若是也。又將古教典禮。裁成變化。百度維新。精微允當。無以加損。以爲萬世當守之規則。永垂弗替。又以身作萬德之表。而孝敬。聽命。謙遜。良善。仁愛。忍耐諸德。實邁古今。羣聖之上。無以比擬。選拔門徒。計十二位。非聰明豁達之士。亦非富貴顯達之人。皆係貧賤愚魯之輩。以漁業爲生者。蓋世俗所慕者才華。所羨者榮耀。耶蘇皆鄙之薄之。所以訓誨吾人。知重大體。而輕小體。甘貧苦以勤道德耳。耶蘇在世三十三年。歷盡艱苦。有四聖。

史。一名若望。一名瑪竇。一名路加。一名瑪爾谷。備述其語言行事之始末。聖跡之廣多。敷布寰區。耶穌門徒有至大西諸國者。有至天下各邦者。其中有一位聖徒名多默。傳天主教至小西洋諸國。斯國係中國鄰邦也。迨後或多默。或係其門徒。傳天主教。曾至中國。今小西洋現存一古跡石碑。詳言多默至彼傳教之來歷。憑據昭然。不能泯滅。又回教之興。在耶穌升天數百年之後。雖其教與天主教大相刺謬。然極口讚揚耶穌德行純全。稱爲大聖。不但此也。當耶穌傳道之時。與其升天之後。天下各邦。雖未與聞天主教。然其經史所稱耶穌事跡。與今天主教經書。實相印證。有天主教修士于康熙年間。曾至彼處詳閱此經。係如德亞國古時文字。其中預述耶穌在世之行實。亦若合符節。無如耶穌降生之本國。雖素奉真主。係開闢以來之天主教。而時際末流。人心變亂。規誠蕩然。名家巨族。皆傲妬居心。

重富貴輕貧賤。外君子內小人。耶穌每於大庭廣衆之前。直揭其隱惡。責其虛假。若輩不忍受其直言。痛恨其聲名洋溢。德行高峻。謀欲殺之。以洩其忿。爰假控若干欵妄證之辭。陷耶穌于大辟而殺之。彼時如德亞國屬大西羅瑪總王所轄。命一大吏統治其國。其官名般雀。姓比辣多。此官未奉天主教。但深明耶穌無辜。良心難昧。不忍定耶穌死罪。爰設多法以開脫之。無如此官居心柔弱。恐羣惡變亂鼓譟。無法申明耶穌之冤。遂定死罪。任惡衆枉殺之。惟云。此無辜人之罪。與我無與也。惡衆齊聲喧嘩曰。倘殺此人有罪。其罪在我輩。及我輩之子孫。與汝無涉。但惡輩雖殺耶穌。其中有無數之人。深悟其非。痛懲其罪。洗心而認耶穌爲從古以來預言之大聖。謂其雖受天下奇苦。而於其中更顯耶穌之至德。爲從古所未有也。但其中有一種怙惡不悛之輩。固執已見。卒不肯認此聖人爲天主教古經預

言之大聖。故自當時迄于今日。尙望古經所稱之聖人生焉。嗟乎。此輩所待之聖人。至今一千七百餘年。企望雖慇。而願屬徒勞。足徵此聖人已來。惡輩自不肯信耳。按天主教古經及耶穌預言。俱云羣惡自妄殺耶穌之後。四旬之期。天主大彰義怒。嚴罰此國。許敵人統兵。三載攻圍。殘殺殆盡。餘則盡爲敵人所擄。爲僕爲奴。迨四旬後。果如耶穌預言。絲毫不爽。今予不忍言其苦之慘狀。彼時城內有一官。備錄其事。作爲史書。得傳于後世。當時敵人雖非天主教。然睹此情形。極苦極殘。人人莫不落淚。深歎此事。云非人也。乃天也。今此惡衆之苗裔。分逃天下萬國。一千七百餘年。不能旋歸本國。散居各邦。即我中邦鄰國。皆有此種人類。非徒奉天主教人不與爲婚。即非天主教之人。亦甚鄙之。恥與同類。是蓋天主特留此輩以作後世傳天主教之明證耳。○或曰。天主既稱至尊無對。今降生爲人。不惟受盡

艱苦。卒被惡人釘殺。與天主尊高之性。大有未便。何以傳之于世。令人信從乎。曰此理精微。原超人性靈之上。誠未可以人意究測者。欲明此理。宜屏絕俗見。獨抒精思。會悟之後。不獨于理並無未便。且感激涕零。謂天主大父惠愛吾人。何竟至於斯極。當知天主本無形象。無聲臭。而爲自有靈明之全神。因我輩原祖。獲罪上主。人性大壞。愈染愈深。天主本性至仁。不忍萬民同歸淪落。故用其全能下結人性。降世爲人。稱名耶穌。耶穌譯言救世者。係真人。亦係真天主。代受艱難。以拯救萬世人類。不可赦宥之罪緣。蓋若非真人。則不與吾人一脉。何憑而受救贖之劇苦。若非天主。則功德有限。無以弘救贖之極功。惟真主真人。兩性兼備。上足以補天主之尊榮。下足以拯生民之重罪。洵仁之至義之盡。德行尊高。誠不可以言語形容者。但天主性與人性。耶穌雖兼備一身。實則判然不雜。如吾人之性兼備形

神二者。但神是神。形是形。不能相混。故耶穌受惡人之苦辱。惟係人性之事。而天主性。斷不能受之也。如人形軀雖然受殺。但能傷其形。豈能傷其神乎。耶穌茹受多苦。非能強之使然者。其願受與否。願死與否。皆由己。迥不由他。倘不願受此苦。立命地裂。翕吞惡輩其中。或轉移其心。使不敢縱惡無忌。無有不可。乃卒受惡輩之殘傷。而不避不辭者。足徵其愛人至極。甘受一死以拯救人罪也。耶穌在世。嘗向門徒云。予雖死。三日必然復活。惡輩曾聞是語。恐耶穌門徒盜去其屍。令兵弁看守其墓。惡輩切囑兵弁等云。汝等切莫向人言其果已復活。當云係其門徒盜去。然惡衆枉用心機。徒勞無益。而耶穌果于第三日寅時復活矣。耶穌復活後。數見其門徒等人之前。坐論言談。同飲同食。特令其門徒。親目睹其傷痕。覩其光華。迨後耶穌門徒。傳道萬國。寧受劇苦虐死。不肯背棄耶穌。明證其復活屬真。毫無

可疑也。當知耶穌在世。歷盡艱難。釘十字架而死。非欲避而不能。乃能避而不肯。且耶穌被惡衆釘十字架而死。在世時曾屢次明言之。又引古經以明證之。至是言言恰中。事事符合。洵無容置喙矣。推其故。緣我輩罪惡深重。入人心髓。世間邪教倡行。中人性情。故受苦至死。以拯萬民夙罪。力除頹風。立諸德芳表耳。耶穌未降生以前。天主古教之人。惟用犧牲之血。顛挽天主之義怒。耶穌既降生後。乃實用其本身之聖血。代熄天主之死刑。此一祭也。是耶穌以本身當犧牲。洵包前古。統後今。功德靡窮之一大祀享也。雖天主性不能受苦。但天主性與人性兩性兼全備于耶穌一身之中。以主性高其功。以人性補其罪。罪大功高。兩兩相對。莫不相稱。故耶穌口誦經言。躬行德業。論人性雖云微賤。論主性則貴尊靡窮。蓋其一動一靜。一念一行。莫非天主之精微妙旨也。今乾坤萬物之燦陳。所以昭傳天主。

之全能無上。降生救贖之偉烈。所以畢露天主之極仁靡窮。且令吾人知已罪深重。無可復加矣。子勿謂世俗之尊榮顯耀。以爲難得矣。然而修德之君子。往往輕之。有德者輕之。而天主爲萬物之原。反重視之乎。當日惡衆譏笑耶穌。而輕之賤之。卒至釘殺者。蓋謂已安富尊榮。而鄙耶穌貧賤勞苦。與已不相稱耳。不知天主古經預記耶穌降世之德行。尊榮有二。一則言其在世三十三年。視苦如飴。棄富貴。甘貧賤。重道義。崇功修。令人重內輕外。以適德行之真路。尊莫尊於此矣。榮莫榮於此矣。一則言其復活升天。將來審判生死。其時威靈赫濯。莫與比倫。乃惡衆居心愚昧。喪盡天良。惟懸想天主降世。爲人必然尊貴無比。與世上之大君相同。威靈昭著。故深鄙耶穌降生救世時。甘貧賤。受苦難之實德真修也。因此將耶穌釘死。每顧而不悔。殊不知天主目中。惟德行最爲尊高。一切世福。俱屬空幻。今觀

耶穌降生於世上。雖爲代贖吾人之罪。甘心受世上諸苦辱。然謙忍順命。良善仁愛。諸德更覺光明顯耀。如美玉生於石中。雖自韜光匿彩。若剖而取之。琢以錐鑿。磨以砂石。光華發外。更極美觀也。如此。則天主降生蒙多苦難。與天主之尊威。究何傷乎。○予以前論耶穌爲天主降生。憑據萬千。俱有切實之理。決無可疑。但此理淵微。超越人性之上。予猝然聆之。尙未深明。必心中懸擬。未肯遽信耳。予試虛心聽之。吾備陳耶穌所傳之教。所顯能力。所著效驗。予自明耶穌爲救世真主矣。倘天主降生一事。稍有可疑。必其大壞人心。重傷世道也。乃自耶穌降世以來。至今不過千餘年耳。而聖人迭出。不下數百萬。概皆忍世苦。棄世樂。童貞致命。與愛仇等絕世德行。史不勝書。且萬國之人心以正。萬國之風俗以醇。較之他教。萬萬超出。若非耶穌真正天主降世。何致有如此能力。如此效驗乎。是可知傳此道者。

卽係我等敬奉耶穌之人。明知此理不合時宜。逆人私欲。無奈理真義切。深悉耶穌實爲天主。其孝敬聽命。良善心謙。仁愛神貧諸德。實超千古以來神聖之上。大有神力。動我心思。克己苦身。修德行善。故感激涕零。毫不避世俗之憎嫌。每喜向衆人道也。○他教未嘗不迫人作善。然而作善而冀望世福。遠離世禍者。舉世皆如此。中人以上者。雖幸超乎富貴之上。而浮雲視之中人以下之人。將盡溺乎富貴之中矣。吾天主聖教。迫人作善。并無他爲。惟使人堅心定志。輕棄世間一切虛僞等事。一惟欽崇上主。故所行萬善。洪纖巨細。俱會歸此大道真元耳。譬如射箭者。雖億萬斯人。均期中鵠。猶之天主惟一。而欽崇之道。不能不歸於一主也。天主教有多端至理。中國經書。未經發明者。如愛仇童貞致命等三絕德。一男止配一女。雖尊爲王侯。亦必遵守此規。不敢縱私欲。而違天主之定命。篤守教規之人。雖

世苦頻加。而天主時加寵恩。默佑其衷。使之愈苦愈堅其志。久之則苦不爲苦。中
心之神樂。有不可以言語形容者。如此妙道精義。洵非本性所能想及者。足徵天
主教是天主特立之教。不得以人意參乎其中也。論人本性。有仇者。必思報其冤。
孤子者。必思配其偶。趨吉者。必思避其凶。孰肯逆本性。而愛仇絕色。輕身命。甘迎
世苦。以終身者。况夫偏觀一世之人。其處心積慮。未有不專爲一己。專爲一家。一
國者。且明明善惡。俱有永報。而畏言死後。專論生前者。豈非以一人之私意。參乎
其中。昧失立教之大本乎哉。天主教不然。教有原本。道不虛傳。有兩種經典。彪炳
宇宙。天地可燬。而此經不能不行。一係天主耶穌降生以前。先知大聖預錄者。
一係天主耶穌降生以後。天主聖史。將耶穌在世之言行。隨時恭錄者。一爲古經。
一爲新經。古經預錄天主耶穌降世。確在何時何地。行何聖跡。受何苦難。立何德。

行昭垂前古。期驗後今。新經則據耶穌言行實跡。備錄無遺。雖兩經相隔數千百年。而言言相符。絲毫不爽。倘非天主從中默啟。安得古新二經。前後一轍乎。徧察萬國經書。皆無此證。則知他教經書。皆係人立。獨天主教經書。允係天主自立。無疑矣。不然。何以迪人作善之道。如此逆人本性。而萬國人心。甘守天主至奧之玄旨。不敢少萌他念也。○天主教教人之道。固自無窮。其要總歸二者。愛天主于萬有之上。及愛人如已。夫愛人則必人人共相和睦。假使一國之人。彼此和睦。則千萬人結爲一心。爭于何有。亂于何生。將見人君主治于上。臣民奉法于下。國家太平。寧有盡乎。乃未聞天主教眞理之人。見敬奉天主之人。彼此相愛。不與人爭。每疑天主教係賢哲所立。特爲保守國家耳。當知天主所立眞教。原于國家有益。因人爲天主所愛。愛人即是愛天主。人不愛人。斷未有愛天主者也。今因天主教教

人愛人。與國家有益。竟謂係古賢所立。專爲保守國家。夫豈可哉。○或曰。天主教論天主之賞罰。永久而規誠。又甚嚴密。何怪人心畏避。拒而不從乎。不知賞以彰天主之至仁。罰以彰天主之至義。世主有賞罰。而天主獨無賞罰乎。天主之賞罰。必與天主之仁義相對。天主之仁既無盡。其賞亦無盡。天主之義無窮。其罰亦無窮。此必然之理也。且天主本性至永。而以永福賞善人。善人不得不服其至仁。以永禍罰惡人。惡人安得不服其至義乎。况人之靈性。有始無終。惡人心定于惡。惡既定。而永遠之罰所必然矣。又天主至尊。不容獲罪。雖係微罪。天主之前。猶爲巨愆。况犯多重罪。怙終不悛。又安能逃身後之永苦乎。雖然。天主之罰惡固嚴。倘人能卽時遷改。必蒙天主慈宥。若至死不悔。天主方降永罰。雖悔無及矣。悲夫。天主教十誡。天主而下。首列孝敬父母一事。最爲重大。况天主之賞罰至公。而于人子

之孝。不惟賞以永福。更以世福報之。于人子之不孝。不惟罰以永禍。且以世禍刑之。歷觀天主教經書。詳載此事者。不一而足。中國儒者。稱虞舜爲大孝。以舜爲千古孝道之標本。而中國之人。皆取法焉。天主教遵耶穌爲至孝。以耶穌爲萬世孝道之準則。而天主教之人。更莫不效法焉。且天主教經書。確紀耶穌家居三十載。克盡子道。罔有遺憾。其言甚備。不但此也。耶穌當苦難之遭。身懸十字架上。尙切念其母。諄囑其門徒。名若望者。代已恭奉其親。至死不忘也。今天主教欽尊耶穌爲天主降世。耶穌以孝道爲重。而躬行立表。以教萬世。天主教既尊崇耶穌。寧敢悖耶蘇。稍作不孝之事乎。吾中國之人。竟有妄加天主教以不孝之名者。予始聞而駭。繼而思之。大抵因天主教之人。親沒後不隨世俗頹風。行焚燒紙錢等虛妄之事。遂加此詆謗耳。此非理之論也。倘謂親沒不焚燒紙錢。卽以爲不孝。是不知

孝道之大本。果何在也。中國堯舜禹湯周孔。親沒俱未焚燒紙錢。豈堯舜禹湯。皆屬不孝乎。上古時。不特無紙錢。并未造紙。紙尚無有。何有焚化紙錢等虛妄之事哉。至後漢蔡倫始造紙。後漢方有紙用。足見焚化紙錢。不但非孝。且令人以虛偽相將。而失孝道正旨矣。吾天主聖教道理真實。虛偽之事。纖毫不容。明論人之一身。具神形兩者。形軀之死。特暫死耳。而靈神永無死滅。將來定與其形軀相合復活。以聽天主之嚴判也。蓋吾人在世。所作善惡。係形神兩者同作。將來膺受天主之永賞永罰。亦係形神兩者同受。天主教既信此道理。必較世俗奉敬親屍之禮。更莫敢忽畧矣。故吾天主聖教于親沒時。屏絕焚化紙錢等虛妄之事。請教中有德之士。誦經嚴齋。懇求天主仁慈。赦其在世時所行過惡。速賜升天。享受永福。又將銀錢施捨貧人。補其罪愆。豈如世俗于親亡之後。但焚化紙錢。以爲冥資乎。事

之真妄。必有能辨之者。且天主教人于親終後。連日誦經禱主。拯救其靈。身服重孝。三載而止。每逢週年。更加追思。永垂弗替。至于喪葬之禮節。無乖正道。無闕孝道之大本者。天主教俱可因人情。隨風俗。便益行事。蓋喪葬之禮。南北不同。東西各異。卽以現在中國之行喪禮者而論。滿洲不同乎漢人。漢人不同乎滿洲。因富貴貧賤。各有其本分。當盡之禮。紛然不能盡一也。但考道根本處。無論滿漢富貴貧賤。天下各國皆相同。不能或殊。是故孝也者。當兼內外兩端。而喪禮者。乃外儀節文。而真正孝道實義。惟在內盡實心。奉聽親命。敬愛純篤耳。此家不異俗。國不異政。達之天下。不容或有變更者也。○天主教有其名。亦有其實。名與實誠相對矣。蓋天主教其名也。而天主教中所當遵之正道。其實也。如有良心端正。具是非公論者。一聞天主教之名。必因名覈實。中心服之。斷無異論。今中國多人。但聞天

主教之名。不詳察其實理。惡其名。并惡其實。豈三代直道之公論乎哉。試觀一人。
素稱敦龐。人所敬禮。或一官長。夙著廉正之風。大有甘棠之愛。後聞其習奉天主
教。人人輕慢。贊揚之口。忽變而爲恥笑之談矣。仲尼曰。吾之于人也。誰毀誰譽。假
使孔子之在今日。定然直斥其非。斷不隨聲附和。以沒人善。衆惡之。必察焉。佛教
自漢明帝時。方入中國。假使當唐虞三代之際。卽有佛法竄流中國。吾知二帝三
王。必嚴加誅黜。斷不令其蔓延當時。貽害後世也。蓋仁義道德之教興。則虛無寂
滅之教息。誠有勢不兩立者。今奉天主教之人。所敬禮者。惟一天主。卽二帝三王
敬禮之上主。有何悖謬乎。乃有一種居心蒙昧。不明正理之官府。拘拿天主教之
人。逼令敬拜佛像。背棄天主。閒有一二信根未篤之人。阿從其意。卽加釋放。赦爲
無罪。倘毅然直認是天主教。卽加刑僇。嗚呼。是非不明。公正盡罔。其于二帝三王

之直道。不大相悖戾乎。且孔子爲中國萬世師表。既爲孔子之徒。當遵孔子之訓。
孔子設教東魯。昭垂名教。訓誨萬民。敬上主而愛世人。絕異端以崇正學。今官府
曾讀孔子遺書。身列庠序。名登清華。乃逼令欽崇上主之人。跪拜一切佛神僞像。
倘稍有良心。何忍出此耶。○天主教道理眞實。謂宇內有一天主。宰制天地神人。
萬物。謂人自有主。分辨善惡邪正。而趨之避之。皆依賴上主默佑。非由已力。必如
此。方見吾人死後定有真正賞罰。吾人生前定有真教所當奉守。以獲永福而免
永禍也。蓋天主真教。有百萬典籍。證明其理。百萬聖賢。詳究其義。故迪人趨善避
惡之道。無不恰中人之性情。按神病而施神藥。靈性之痼疾以瘳。歷世苦而忍世
禍。心之怨尤以泯。且主祐頻降。意快神安。道味時存。情和性定。今察天下萬教教
法。雖有千端。然真主不明。行善多僞。俱非迪人行善避惡之正道實學也。予素惡

空談雅愛眞理。一聞天主教眞詮。始悟從前謬戾無窮。卽時根究。刻不容緩。故洗去前非。以奉真教而敬真主。游移之見。變爲堅定之心矣。今而後惟有恪守真教。規誠。憂躬行之或怠。慮欽崇之未純。豈敢復萌他念乎。但人心之良。愛全眞。亦愛全善。倘天主教未爲眞全。子素稱明智。能于高天厚地之中。更有眞全之教。超乎天主教之上。請子細陳其教法精美。吾必信從。不容稍存游移之見。有負吾子厚愛之心。是吾之奉天主教。非吾自導。實天主導我也。○吾子詢問天主教之理。已非一日。固已辨晰毫釐。不爽鑄銖。天主教道理。如精金美玉。吾與子辨論。又非一日。子洵知其教誠嚴密。渾全無缺。允係良心所固有。作聖之階梯也。試問苟有一人焉。以誠慤之心。入教奉主。以肫切之意。虔守規程。假使天主教本係左道異端。天主慈愛吾人。最無窮極。何忍此人喪其心性。陷于異教之非乎。夫驕傲殘妬之

輩貪財好色之流。大干主怒。聽其陷于邪教。罰固應爾。然而天主尙加矜憐。多方提醒。令其改過遷善。以歸正道。何忍敬拜真主。恪守天主教嚴規之人。竟使其昧失秉彝之常性。惑于邪教以終身耶。天地間斷無是理也。況乎西洋人輕去本鄉。離別親友。涉險海。歷巉崖。萬苦千辛。逆旅各國。地不論文野。風不論醇漓。隨方就俗。布教化人。倘天主教非眞。天主又何忍使此許多之修士。幼而棄家離俗。長而飄蕩寰區。不一加憐憫。不良可悲乎。○人有兩句常談。一曰。吾人身居斯世。一曰。吾人雖身居斯世。不能永久。必須要死。但孰生我于斯世。孰死我而出離斯世。竟昧然莫解矣。豈卽家庭內父母生我乎。抑天地間更有大父母生我乎。豈生我于斯世。惟爲避此現世之災難。享現世之福樂乎。抑身死之後。尚有無窮盡之永禍。至悠久之永福乎。且世上止有君親當盡忠孝之誠心乎。抑宇內又有生我養我

救我之大君大父。當報其深恩。以合其聖意乎。以上諸大道。概乎不能深悉。苟明乎天主真教之正理。則從前恍惚無憑之見。定然俱有真見矣。如一人泛大海。住舟山島偏隅之鄉。其人熟寐。不啻小死。若同舟侶人。棄此人而置之海島中。乘風遠颺。而此人方寤。四顧寂然。覩島中人無識者。其人現在何爲。將來作何歸宿。未知可也。嗚呼。予以前未奉天主教。俯仰天地之廣闊。侶人物而友山川。無蒂無根。飄飄蕩蕩。毫無定向。何以異是。今吾旣奉天主教。識認天地真主。居世有真修正路。離世有永遠天鄉。予茲幸矣。更喜吾子心靈性慧。真聰懽然。辨論天主真教之理。根究到底。不留遺義。今而後。願與吾子終其身共欽此維皇上主。無怠無荒而已矣。

